

四庫全書

史部

# 欽定四庫全書

史部

山西通志卷一百三十五

詳校官給事中臣王鍾健

檢討臣德生覆勘

總校官進士臣朱鈐

校對官中書臣吳俊

謄錄監生臣宋大樽

欽定四庫全書

山西通志卷一百三十五

人物

三十  
五

絳州

明

梁溥字弘濟稷山人弘治己酉舉人陝西延川教諭溥  
學洽聞見義勇為時延安守安陽崔公陞重其才令  
署郡學遣其子銑受業焉外艱歸諸生哭別皆失聲

服闋陞南京國子監學正三載考績陞慶府長史屢  
乞歸養王懇留之丁內艱後安化判逆瑾矯旨罰贖  
米四百石人謂以半賂瑾則免溥竟輸米服闋補秦  
府長史

楊謙聞喜人弘治壬子舉人知武城縣以才堪治繁調  
諸城復謫平山衛知事武城諸城父老千餘赴闕爭  
保銓部以單縣尤劇調單縣流賊聞名遠遁卒保城  
池蒙旌異進二級子勗肖嘉靖庚子舉人授洛川知

縣政簡刑清識者謂有宓子之風

張環字瑤夫絳縣人弘治癸丑進士授棗強知縣陞階州知州資性剛方好學不輟建一卷自題曰菜菴

文皓字孔暘垣曲人宋潞公苗裔家甚貧晝鬻薪供父母夜則乘月讀書終夕不輟弘治丙辰進士知平原縣著喻民詩及民情利病條約屢折疑獄丁內艱上官熟其清苦檄賻贈之卻弗受補衡水縣清河奸民以田千頃投獻德府居人屢奏辦不能直勘得其實

立返諸民擢監察御史清查遼東軍儲疏劾布按大吏時逆瑾用事道臣差回必以賄進皓獨無又治其私人孫恭如法瑾銜之屢遣人伺察無所得後往南京照刷文卷丁父喪衰服復命猶劾國公以下若干人補河南道疏論留都張尚書附逆瑾狀侍經筵劾中貴橫肆又上保民息盜六事並不報出為河南副使督理河道令民五里內者赴工五里外者輸銀工成民不知勞魯山有習白蓮教者誅其首惡餘悉散

遣歸農蒞任三年再疏祈致仕家居二十年卒

陳希良絳州人弘治戊午舉人性嚴毅為真定推官定  
州豪楊錫以產故控于巡撫巡撫委希良鞫之錫因  
以錦衣冠相太監張雄書求庇希良不受繩以法相  
與雄憤甚噬錫訐希良陷於囹圄竟死嘉靖改元州  
守李文潔始以狀上聞曹于汴為之贊

李應奎絳州人弘治甲子舉人授平山知縣開誠布公  
與民相信凡八年陞陝州知州有楊昆父子含冤下

獄應奎得其情力為辨巡按執不可辨益力竟忤坐  
罷巡按以他事罷昆寃亦白平山祀名宦

申儒垣曲人貢生官寶慶經歷弘治間朱天章亂偕子  
逐之舟至洞庭遇伏被執不屈死當道為立祠以祀  
焉

張滋字天潤毗孫弘治間貢士授遼東都司經歷剗剔  
宿弊不避權要陞靜寧知州適饑饉綏輯賑卹民賴  
安集世宗即位進階朝列大夫



趙載初名君琰正德辛未登進士第賜今名因字文載  
垣曲縣人初官戶部主事歷員外郎中奉命督漕運  
抗疏言漕政利病擢陝西參議分守商洛道削平叛  
寇賜白金文綺會土魯番侵哈密為邊郡害總督楊  
一清以副使薦備兵甘涼廷議掩擊為便載請仿趙  
克國故事乃興屯練兵開鹽召商士馬飽騰所向克  
捷番約蘓穆爾與特默格等各率其衆來降遷參政仍  
備兵其地擢僉都御史巡撫甘肅數年政教脩明威

聲遠播異域相率讐伏晉南京右副都御史提督操  
江瀕行條列邊務十二事為忌者所中事白尋卒遣  
官諭祭治其墓廕子入監所著有都府奏議及忠貞  
錄忠節祠集諸書

范昕字晦之絳州人正德癸酉舉人初官趙州知州值  
世廟幸承天駕過次日行宮災大吏將移罪散僚昕  
不聽慨然自認及同知承天御史以陵監家人橫肆  
不法屬昕鞠訊昕論報如律陵監銜之誣奏御史及

昕下獄戍南海昕言動意氣如常時不少變後遇赦  
歸萬厯中晉階四品

陶滋字時雨絳州人尚書謚恭介琰子正德甲戌進士  
初官行人值武廟南巡抗疏力諫伏輦下不起詔廷  
咎之幾斃謫國子監學正擢刑部郎中改兵部武選  
大禮議起以去本生二字伏蒲哭諫聲徹大內傳旨  
廷杖繫獄三年後仍謫戍世廟上賓有詔錄用已前  
二十年歿矣滋學問淵博為學正時以石鼓文殘缺

上下千古考覈精詳刊石鼓正誤一書隆慶初贈太常寺少卿

李淮字巨川聞喜人正德甲戌進士性孝友居鄉以行誼著初官刑部主事督太倉及密雲儲公廉明允屬吏皆知畏愛中官怙勢者亦感動有加禮已復督糧江南理餉遼東擢四川參議分守河西督邊餉有詔使奉命勘畚人入寇情形受執政指將有所中傷淮極論夷情反覆國體宜正不可重為欺罔詔使不能

奪擢副使備兵岷洮總制王以諳練邊情奏留整理  
河西加參政歲饑奉委散賑窮鄉僻壤必身親歷雖  
嬰疾不遑寢食至永壽嘔血數升未幾特命巡撫延  
綏疾益甚未蒞任卒淮潛心理學所著有詩經辨疑  
及小窓清適諸集

王時雍垣曲人正德丙子舉人授山陽知縣歷任武城  
華陰知縣門無私謁訟不淹滯倉庫有儲緩急有備  
以才德兼優陞徽州知州終西安同知所在政聲茂

著

韓瓚絳州人正德己卯舉人歷教諭陞藍田知縣政尚  
廉平百姓為立生祠陞漢中通判會妖人劉列謀為  
不軌瓚監軍督率有方斬首五十餘級生擒百餘人  
獲偽詔及妖書欽勞金幣起補保定陞濟寧知州節  
愛有聲補通州兩院才之京兆憎其傲調寧州致仕  
陳韜絳州人萊陽丞正德間流寇攻城與子死之事聞  
贈登州府通判卹廕如例

王价字君藩勣子正德間歲貢授鳳翔府推官廉明果斷獄無冤滯屬岐郿二邑土貧俗惡官者難之价署篆事以德感化卓有異政河州民番雜居茶馬滋弊當道者擇价往易价防奸塞賄稱物平施甫三月而馬數至十萬民歌謠如出一口

郭孜垣曲人以監生授四川威遠知縣勸農浚渠廣儲救荒修學造士百姓有青天之歌以考績卒於京威遠士民在京者咸製服舉哀後部民立祠追祀焉

景一元聞喜人嘉靖癸卯舉人授慶都知縣以清謹稱  
陞濟寧知州路當衝繁舊額商稅千餘金俱申革之  
守正不喜浮沈轉韓府長史夙夜匪懈王加禮重進  
階朝議大夫改服俸九年辭歸王時存問焉年近九  
旬卒為人純雅平易歷官三任家無遺積至今邑稱  
清白

加傳字習夫稷山人嘉靖己酉舉人任曲周知縣卹里  
甲革兇收撫河夫禁賭博生平無一事請托於人當



官亦無一事受人之托居喪哀痛卒年僅四十四人咸惜之

張守中字大石聞喜人嘉靖己酉舉人初任保定通判遷通州知州庚戌之變總制某以敵人勢迫欲入城為自守計守中折以大義拒不納而饋運糧餉士馬皆宿飽事平擢密雲兵備遷神木副使築邊牆梵神木城皆以身先士卒與同甘苦擢僉都御史巡撫延綏一日御一騾隨一引馬馳百餘里至守備城啓倉

厥視之糠土強半即呼首領官令煮食之不能因治  
以軍法兵備譚二華參將戚繼光皆有宿望亦凜凜  
奉約束唯謹初至敵頗易之既而出奇計大破其衆  
相顧駭遁莫敢復犯延綏軍士素驕肆守中痛繩之  
一夜挾弓矢射轅門者如林守中高卧不為動次日  
早起據堂皇召巡捕官問射者無一人敢應尋以勞  
卒于官加副都御史贈兵部左侍郎賜祭葬如例

王宗舜號耕山聞喜人高祖梟刑部主事父澄清河訓

導俱有聲聞宗舜嘉靖壬子舉人癸丑聯捷進士任  
衛輝推官執法明刑擢湖廣道監察御史卓有風裁  
不阿權貴有王鐵面之稱陞臨清道副使遷陝西參  
政以內艱歸不復出謝賓客為四柳園與稷山梁承  
齋猗氏何肖山諸人詩酒自適兄宗堯癸卯舉人官  
刑部郎中

周心易絳州人嘉靖丙辰進士授廣平推官剛明嚴慎  
執法有聲轉蘇州同知代吳縣審編三日報完升降

允當吏民欽服

趙三聘字天民號任齋河津人嘉靖戊午舉人隆慶戊辰進士授益都令為兵備某所忌謫河南藩司照磨尋遷江都令邑苦徭役行條鞭法民稱便丁內艱服闋補獻縣導河俾民無昏墊凡三令薦疏十上陞守禹州時中州苦盜嚴行保甲法妖黨株連數郡禹獨無百姓建祠祀之入拜司農郎督饟遼左督府顧沖菴數咨密議特疏薦擢四川按察副使備兵東川引

疾歸年六十五卒

楊守川絳州人嘉靖辛酉舉人授富平知縣動履謹飭  
不妄交與防吏胥如寇愛百姓若赤子縣北山產石  
諸郡縣來採者故事縣代為役里甲更班焉名匝班  
每歲費數千金百姓苦甚守川申請得均派民力得  
蘇其惠永矣

甯桂字攀之稷山人瑛曾孫嘉靖辛酉舉人少孤既領  
鄉薦家徒四壁居母憂徒跣三年不食菜果不扇不

爐任陵縣訓導教重倫行却一切饋遺士人思之陞  
國學晉工部司務戶部員外布袍脫粟躬親操作遷  
工部郎中卒於邸舍無楸枿之資同舍郎賻金歸櫬  
鄭命字為命稷山人嘉靖辛酉舉人任宜君知縣申減  
夫價五百餘金罷土官帶兵徵索之擾禁僚佐私交  
豪右之弊請賑救荒邑人德之謝政歸囊惟圖書衣  
冠而已子寅字子夏萬曆癸卯舉人長安教諭轉國  
子監助教遷大理寺寺評事累陞郎中山東按察司僉

# 事

孫光祐絳州人嘉靖壬戌進士授承天推官陞文選司郎中歷遷應天巡撫分考鄉闈得蕭良有在選司官惟其人請託不行吳當大水後請蠲風逋無慮數百萬石妖僧起京口構結甚衆光祐殲渠魁餘置不問在蜀故事蜀藩朝賀五叩頭光祐請如制王曰誠如先生言第彰先王之過奈何光祐曰克蓋前愆正在此舉王從之終南京戶部侍郎

翟繡裳號左溪聞喜人嘉靖壬戌進士授雄縣知縣補  
商丘入為兵部主事條陳邊計擢關西分巡道回民  
叛單騎入寶雞諸山寨宣諭之衆皆伏遷山東參議  
轉參政分守遼海遷按察使兵備密雲晉山東右布  
政使擢右僉都御史巡撫順天薨山海關牛欄山熊  
兒峪等城修石塘潘家桃林等口昌平黃花等嶺嘗  
子峪鷄子洞等處胥關地方百年大計尋以邊警起  
力主用兵不合再疏乞致仕築圃涑水上聚圖史日



夕其中以名檢自勵編族譜置義田優游閭里二十餘年卒

姚鏜字鎮遠稷山人嘉靖初貢庶靜寡欲篤學力行任饒陽知縣單騎赴任居御無異寒士日教民忠孝守法徧植桑棗民利賴之以剛直忤權貴左遷寧夏衛經歷操守愈堅致仕歸杜門讀書不入城市

韓科絳州人重曾孫嘉靖間貢授濟南通判運糧指揮有貪肆者民甚苦之科力陳當道斥去民豎碑頌之

陞葭州行之日庫有羨金三百申上封識之葭久荒多方招集賑恤陞韓府長史

許恩字仁甫絳州人隆慶庚午舉人知寧陽募民闢荒給以牛種逃者咸復業稱樂土起補館陶會潞藩之國取道於陶恩名素重諸從者秋毫無犯尋陞刑部郎中

高應聘字志尹稷山人隆慶辛未進士吳縣知縣釐弊革奸不避權貴邑瀕太湖濟渡處多劫寇應聘更番

設戍行者便之吳民題曰高公渡范文正公義田為  
豪右占幾盡應聘置於法遂按籍而還為讐者所中  
謝政歸講藝課文賑饑濟貧閭里咸推重之

裴賜稷山人隆慶辛未進士授兵部主事鎮山海關轉  
車駕會上謁陵從大司馬扈蹕欲輦金共事尚書不  
可輒輦金以行抵昌平上命犒師計數千金賜猝辦  
人驚異之遷職方有大璫餽金千以私怒斥去庚辰  
例當典春闈江陵為其子預授以意不應遂易他曹

尋出治兵井陘諷言官中以他事謫華州知州不赴  
歸

王之翰字維藩絳州人萬厯元年舉于鄉銓膚施知縣  
補棗陽有為崔駟筮易林者不吉之翰笑曰孔僖不  
辭晉翰乃辭棗陽乎稅監陳奉欲開青山礦之翰以  
顯陵近執不可奉誣劾之翰聚衆并及襄陽通判邸  
宅推官何棟如之翰報僉事馮應京曰竊聞君有不  
達為不明臣有不爭為不忠翰雖去公在猶可藉手

忠報天子翰死無所憾應京乃極言奉惡給事中田  
大益御史李以唐等又合疏為之翰言卒命緹騎逮  
訊并逮應京宅棟如之翰瘐死天啓初贈光祿寺少  
卿

梁一道稷山人溥元孫萬厯辛卯舉人任藍田縣嘗聽  
訟有應受笞者其子願以身代遂免更獎勵焉百姓  
感動皆知孝毀淫祠崇正誼聞有讀書聲輒躬詣其  
所獎勵再四一時學校大興當道屢列薦剡後以疾

卒民立祠祀之

楊夢熊字徵我聞喜人萬厯丁酉舉人授永清知縣課農桑循行阡陌民德之立祠以祀調大興時史可法應童子試首拔之衆譁以冒籍夢熊曰天子畿無內外天下人皆得試何為冒籍力請於學院又冠多士後可法為一代名臣陞刑部主事歷員外郎延安知府長蘆鹽運使剔弊除奸卻羨卹商陞分守關南道參政未任卒子爾休貢士為人質實好施人稱克紹

先德云

史記言河津人少時家貧賣盃自給尋至運城為諸生  
所辱歸始發憤讀書萬厯戊戌成進士知河南濟源  
縣濟源地故饒又濱河民間樹藝無方蓬蒿翦然記  
言至視罪人輕重令闢草萊自贖為制田器教以菑  
畬法開永利洞水渠使得資灌溉畝獲數十鍾家有  
蓋藏因建啓運書院陳詩書禮樂風厲之濟源大治  
解組後濟源人建祠祀焉後河津人過其地聞為史

公故里人皆環向問起居感嘆不絕

魯廷彥垣曲人萬厯癸卯舉人河南衛輝府同知衛頻  
饑殫心賑濟陞安和知府哲廟大婚隨朝調登州時  
東牟地新立疆場兵民雜處各不相安廷彥調度帖  
然陞雲南瀾滄副使調陝西平涼歷四川參政恩威  
並著遠人畏服歸里置義田贍宗族弟廷芝崇禎癸  
未進士獻縣知縣

郭迎褒字光忠河津人萬厯丙午舉人官至昌平兵備



道副使致仕迎褒清介直朴守正不阿由隴西縣考  
選刑部審錄江南多平反著卹刑稿歷隴右東牟皆  
有生祠去思碑解組歸行李蕭然邑人服其品

甯三翰聞喜人萬厯丁未進士任武安知縣調涇陽俱  
有遺愛歷永平推官工部主事補兵部陞山東布政  
使兵備霸州尋告居鄉和藹不談仕宦修理文峰邑  
人稱之

郭永固絳縣人萬厯己酉舉人令渭南有惠政改令甘

泉崇禎間流寇充斥憑城接戰手刃二賊賊擁上城  
遂被殺妻焦亦罵賊遇害柩歸至雒川賊黨仍懷舊  
恨開棺劈屍肝腦俱盡按臣吳姓以聞七年賜祭葬  
吏禮兵部先後具奏十年贈光祿卿

王國相字調字聞喜人宗舜從孫萬厯壬子舉人授廣  
平通判陞全州知州以清正著聞居鄉平易凡地方  
公事必極言之南山孫起秀作亂練鄉勇同邑庠李  
振礪平之鄉人佩德即其地立祠祀焉

李俸聞喜人萬歷四十三年為刑部郎中諸司會鞠梃擊案張差語涉潛謀郎中胡士相等相顧不敢錄俸力爭乃得入獄詞遂為鄭氏黨所惡遷鳳翔知府後復中以京察卒於家天啓初贈光祿少卿

龐尚廉字國維河津人萬歷丙辰進士授內黃知縣仁愛廉明時一十一屬重獄無不願質成者邑人為立生祠拜河南道御史秉正觸邪不避權貴以不附魏閹轉河南僉事遂引疾告休

張翰芳垣曲人萬厯己未進士授中書科中書舍人端方耿介名重朝紳疏豁遼餉垣民感之

葉震生號梅塢聞喜人父士敦平涼知府積學博聞善古文震生資稟聰穎氣貌魁傑性剛正不苟登萬厯己未禮經魁二甲進士授兵部主事從總督王象乾贊畫九邊多謀畧有邊功陞密雲兵備副使忤璫歸里後起補洮岷道轉靖邊政聲藉甚卒於官

翟期古聞喜人萬厯中貢任濮州訓導闡經課業羣弟

子蒙其教育多有成就遷同官教諭抵家不復出教  
子孫樂田里僻處村塢手不停披非至公不履閭閻  
有古君子風

李儁字明海聞喜人孝友恂謹母景氏年八十餘儁亦  
近七十晨昏問視如兒時萬厯間貢歷陵川訓導太  
谷教諭靜寧州學正躬行誨士為提學特賞平生事  
祖先尤嚴諸鮮物不薦不敢嘗燕居如對賓客書言  
忠信行篤敬於紳以自勵人稱為真孝廉子振圻崇

禎間貢介休訓導

劉應科垣曲人萬厯間以貢任麟遊知縣老成正直人不敢干以私時值寧夏之變賊勢甚厲應科登陴誓衆築壘固守嚙指自矢曰以死報國分也士民皆感泣尋賊滅以憂去頻行惟冠蓋圖書而已補清澗除一切苛政惠愛留思

任贊化字參之聞喜人天啓壬戌進士授直隸棗陽知縣調景陵秩滿擢貴州道監察御史論楊維垣反覆

不忠已復論溫體仁蔽賢攘位與懷宗忤召輔臣及  
五府六部官庭鞠之贊化持議侃侃又與體仁奏辦  
數四有旨降二級調外用補河南布政使都事後起  
禮部主事遷河南督學副使陝西關南道參政卒於  
官

翟夢標字懷玉聞喜人繡裳長子天啓間貢厚重美髭  
髯讀書過目不忘為文雄麗雅量過人雖有犯者誣  
者若罔聞知兼精脈理凡有求者無富貴貧賤咸親

為診視施方藥活人無算終遭閹變不屈而死並無後邑人惜之

溫素知字忠赤聞喜人天啓恩貢沈毅有氣節幼慕蘇長公書畫皆臻其妙崇禎初授華陰知縣邑衝疲極力撫循舉行鄉約革徵收宿弊除里役司支擒治礦賊渠魁撫卹戍孤嚴禁左右不令出縣門遇事傳以木皂會中官入關中所過州縣皆蒲伏郊外素知曰吾不能屈膝閹人探其將至以踏荒避村落間竟不



面文翔鳳有句曰中官昨舍潼津驛但勸折腰顧奴  
赤前騎未至課桑行羅敷水側捫遙碧蓋紀實也調  
邵陽值歲荒俸徵斂止訟獄縣北山接澄城界盜賊  
盤據密授方畧殲其魁餘解散時三春不雨流賊臨  
境率民登陴七晝夜不遑寢食以勞瘁卒於官紳士  
為治喪已復製主士民迎祀城隍廟

翟夢杰號興余聞喜人繡裳季子天啓間以將材歷都  
司秉性孝友母病朝夕籲天求以身代及歿悲號柴

瘠事父與繼母備極孝養卒日悲痛感及行路赴闕  
請卹至於羸疾事三兄如父財產不分爾我白首怡  
怡篤愛不衰任薊鎮訓練士卒同甘苦勤撫卹軍士  
感悅以終養歸兵士泣涕攀留不忍舍己丑之變焚  
燒公署火延其房兵中撲火相戒不犯其濟荒焚券  
邑人稱世德焉子熠後中癸卯舉人任大同左雲川  
衛教授補太原府儒學見大同名宦

趙煒字黃如河津人崇禎七年進士授戶部主事兩督

倉儲力祛姦蠹歷兵部郎中遷霸州兵備副使十五年十一月整冠帶殉難子琬同死贈光祿卿

康四維絳縣人有勇畧燕領虎頸崇禎甲戌成武進士授陽河守備擢山西都司僉書再擢廣西掌印都司賊抵城下四維督兵登陴悉力捍禦久之糧盡城陷賊入四維奮臂巷戰與其妻子俱殲焉

暢一鵬河津人天性孝友崇禎九年舉于鄉為尉氏知縣甫數月政聲四起城破罵賊死

吳繼武稷山人崇禎十四年以武進士任陝西榆林都司忠勇有謀畧練兵足餉思鵲起為國家當一面軍士咸奮躍恐後後二年闖賊入關中榆林邊塞重地多將家子尤為所虎視繼武與道臣都任鄉官尤世祿誓竭力守掣賊使不得東渡賊并力攻踰七日城陷繼武巷戰以死任與世祿亦俱戰歿

撤君錫字賓王絳縣人為諸生有聲從遊者甚衆崇禎中為荊州府訓導十五年十二月李自成向荊州監

司以下皆奔君錫正衣冠端坐明倫堂賊至欲屈之  
詬罵而死

朱東屏宗室子崇禎間闖賊陷城投繯死几上遺書曰  
天下皇皇愧無一長君恩未報親恩難忘惟有一死  
以正綱常子養沖養志亦繼死

文襄汝衡子夫妻以孝聞崇禎間京城失守痛哭成疾  
闖賊陷城自刎于家廟賊聞相戒不入其室四日始  
殮顏色如生又張金鉉歲貢文新命張治光俱恩貢

亦死難

任維清絳州人崇禎間以貢授寧平訓導端嚴莊重時  
時舉忠孝節義事規切諸文學流冠至城破挺身先  
諸文學死之祀寧平名宦

國朝

朱裴本名裴以榜訛裴因字小晉號緋公聞喜縣人少  
為督學袁繼咸所賞中順治乙酉鄉試第一丙戌成  
進士初授易州知州知州例改徽州註誤去官久之事白

補禹州捕大盜張陽寘於法雪諸生余愛枉擢刑部  
員外郎諳律例讞覆不假吏胥尚書張秉貞奇其才  
會擇部曹有聲望者試

太和殿奏對稱

旨授陝西道監察御史疏陳八款在臺十一年出按山東  
請發臨清倉米三十萬石以賑饑民又巡陝西茶馬  
入巡五城直登聞鼓院累掌浙江京畿道遂掌河南  
道管理京察大計軍政胥以風力著補禮科給事中

疏請復詹事禁殉葬

命主考湖廣得吳甫生為第一內陞太僕寺少卿再遷太常寺卿會

詔舉博學宏詞舉洪洞范鄩鼎猗氏王含真又疏陳勦逆事宜胥獲

溫旨擢工部右侍郎監造

奉先殿充

殿試讀卷官轉戶部右侍郎時調度兵食日昃多不暇食



兼管寶源局酌權關解銅法會以地震稽察年力引疾得原品致仕家居凡二十年卒

任弘祚字昌祉號龍巖河津人順治辛卯舉人事母董孝任應州學正十年遷漢川知縣武昌裁兵煽變夜駕小舟赴彝陵乞師身任餽餉并請署兵為前鋒賊望風披靡縛偽官致轅門斬之不妥殺一人將軍史蔡繼統兵至胥飽騰去總鎮嚴奇其才邀參帷幄浹旬江漢盡平以疾請致仕漢川士民立石頌之凡子

儀有聲龔序

李齊白聞喜武生順治八年征土寇單騎直入斬一級  
中箭死

孫錫齡字遵仰號和庵絳州人性穎悟為文能稟理法  
辛卯薦賢書壬辰成進士銓注宣府推官宣俗慄悍輕  
犯法有手刃其嫂誣他人者廉得之抵以法又有緣  
逃人株累者冀以賄免斥之曰枉安用賄不枉又安  
用賄按之果枉徑釋之以卓異遷監察御史首請纂

修孝經衍義而丁艱文武官胥宜解任守制又請革  
行戶以除商害禁私派以蘇民困巡陝西茶馬請申  
印烙之制巡長蘆鹽請蠲積欠以引配鹽使豪強不  
得牟利尋掌河南道侍

經筵內陞鴻臚寺少卿轉光祿寺再遷通政司左參議以  
胃病乞休歸卒錫齡嘗迎族兄女於江南俾無至顛  
沛韓雨公歿而業落妻至不能掩土亟賻以葬之

楊永寧字地一號起齋聞喜人父聯萬歷甲午舉人知

寧州永寧六歲喪父昆弟中年最少奉母翟訓讀書  
不懈前已知舉人

國朝壬辰成進士選漢書庶吉士授弘文院檢討與修  
祀典諸書擢國子監司業復積分法以課士戊戌為  
會試同考官舊制祭酒司業無典試分校者蓋異數  
也遷翰林院侍講學士充辛丑武會試總裁轉侍讀  
學士遷光祿寺卿奉

命祭告少昊帝堯陵暨闕里遷太常寺卿歷宗人府府丞

擢都察院左副都御史有處分關吏治之大弭盜貴  
清盜源諸疏當時建之擢兵部右侍郎轉左時宛平  
王文靖熙為大司馬調發旁午嘗以永寧密為規畫  
悉中肯綮而公議時若不欲以材智先人亟稱之調  
吏部左侍郎甄流品錄年勞一日自部歸談笑如常  
方潑墨作書遽擲筆不語移時卒

崔爾仰字子高聞喜人幼力學與兄爾瞻齊名戊戌成  
進士授晉州知州勸學墾荒治行著聞入為吏部員

外郎時懸賞格招閩越降人至者相屬爾仰嚴核符牒印劄得無濫遷戶部郎中開復諸生逋糧者五百四十餘人艱歸復補戶部典四川鄉試出為浙江提學道僉事以勞邁疾強起竣事卒

王鍾靈聞喜人順治戊戌進士選翰林院庶吉士授國史院檢討主湖廣癸卯鄉試請終養服除補原官累遷左右春坊中允再遷翰林院侍讀與修平逆方略予告歸鍾靈性篤孝十一歲居母喪哀毀如成人繼母丁

嚴厲鍾靈事之甚謹丁亦愛之盜嘗夜入室逼父母  
寢鍾靈亟起持長矛往格仆其一人群盜攢刺中十  
餘槍幾斃得請家居捫舌循牆不敢少軼越而郡邑  
利病輒力言丁亥採買草豆議令平陽輸大同鍾靈  
控免其役里人感之

甯世珽字光野聞喜人歲貢二翰子幼穎異十歲補博  
士弟子員攻苦不輟成順治戊戌進士授汾州府教  
授有河汾課士集遷鎮原縣知縣貸逋賦清驛站三

年行取刑部主事遷員外郎斷決明敏

賜袍緞者凡三尋卒於官中外惜之

王懋官絳州人順治己亥進士授歸德府推官以疾歸  
懋官有胆識己丑庚寅間土寇竊發州同徐延議城  
守事城獲全及泣理刑案牘山積剖決如流胥吏無  
敢舞文者尤嗜商略文事二載以疾歸士民懷之

陳所優絳縣人以武進士任陝西寧羌衛守備順治六  
年羌逆黨擾平陽南盤踞絳境所優自寧羌歸敷陳



國威數其罪力詬之死於邑之柳庄村

郭自修絳縣人性梗直少讀書即以忠義自負比膺歲薦授安遠知縣束裝偕二僕就道子弟有請行者不許涖任理民事不少懈未二年綱舉目張尋以石城失守調石城甫至而山賊張自聖率衆來攻自修督民守禦久之城破賊已入自修猶立城頭指揮既而左右悉爲獸散遂爲賊執自聖誘以好語逼之降端坐大罵不少屈自聖怒手刃於城下賊退邑人哀其

忠斂而葬焉後六十年孫維屏迎觀歸石城人郊祭者猶數十里不絕

張其郁垣曲人前貢生順治初授餘干知縣時土寇就招撫奸民多告訐其郁懲之胥置不問援兵多桀驁繩以法子女繯營內者立還之前令屢被賊害其郁出入賊巢至再賊感其誠胥投戈為良民歲饑曲賑之全活者衆一載罷歸親故時賴以舉火

李翀霄字息六絳州人拔貢官國史院撰文中書會

敬謹親王以大將軍征湖南參贊軍前委署衡永郴  
道副使遷上荆南道副使將軍率甲士來鎮抗言令  
駐城外五日內築營房八千有奇民兵胥賴之遷江  
寧兵備道海寇軼鳩茲春穀秬霄時署右藩先檄守  
江浦令城中各杜門乃偕郎總制梁提督謀潛師長  
干伏白下龍江之間復出正兵夜斫賊營而自率吏  
卒搥金鼓賊驚起伏發踐殺殆盡遷四川按察使兵  
後株連繫獄者三百人力為平反殲渠魁三人餘胥

釋請革陝西茶馬累以蘇蜀民遷江西布政使鈐藩  
印簿二偕州縣各執其一執簿允驗吏胥皆拱手後  
以微愆去事白候補而紳胥遂徜徉林泉以終于世  
仁仕至廣西左江道

吉州

殷

鄂侯殷三公也殷醢鬼侯鄂侯爭之彊辨之疾故脯鄂  
侯

周

韓康路史厥之元孫康采趙蘭為蘭氏

屈侯鮒仕魏為武侯之師翟璜所舉進也

唐

崔元亮吉州人擢進士第元和初為駕部員外郎清慎  
自持太和中改諫議大夫每遷官輒讓形於色文宗  
時以直諫名朝廷推為宿望移疾歸東都名為號州

刺史

金

馮延登字子俊吉州吉鄉人世業醫以幼穎悟令事舉  
業登承安二年詞賦進士第調臨真縣簿德順州軍  
事判官泰和元年轉寧邊令大安元年七月電害稼  
發粟賑貸全活甚衆貞祐二年補尚書省令史尋授  
河中府判官兼行尚書省左右司員外郎興定五年  
入為國史編修改太常博士元光二年知登聞鼓院  
兼翰林修撰奉使夏國就克接送伴使正大七年遷

國子祭酒假翰林學士承旨充國信使以八年春至  
虢縣營元主問汝識鳳翔帥否對曰識之又問何人  
曰敏於事者也又曰汝能招降即貫汝死對曰臣奉  
使請和招降豈使職乎招降亦死還朝亦死不若今  
日即死為愈也明日復問汝曾思之否對如前問至  
再三執義不回又明日乃云汝罪當死但古無殺使  
者理汝愛汝鬚髯猶汝命也叱左右以刀截去之延  
登岸然不動乃監之豐州三年後放還哀宗撫慰久

之復官祭酒歷禮吏二部侍郎權刑部尚書明年元  
兵圍汴倉卒逃難為騎所得欲擁而北行延登辭情  
慷慨躍入城旁井中年五十八

楊貞吉州人父椿嘗為獻州刺史貞擢明昌進士第仕  
至河東南路招撫使隰吉便宜經畧使築牛心寨以  
禦元圍急命其子克義克敬壻伍禮厚俱死之又命  
妻孟氏自經女即禮厚妻隆崖死貞乃南望再拜焚  
廬赴河死後屍橫水上門人張安石收葬焉



明

馮受吉州人永樂間舉賢良方正授河南杞縣丞遷吉  
水幕鎮巡江右陳侍郎以才政聞于朝擢永興知縣  
再任秦安醴泉華陰胥有政聲景泰初卒士民哀思  
立祠華山之麓

陳維藩吉州人正德戊辰進士少卓越穎敏十餘歲通  
毛詩弱冠登第授刑部主事折獄明允晉郎中督糧  
薊鎮時武廟東巡錢寧竊威權索賄少不遂中以危

法維藩獨屹立侃侃不少貶寧假他事逮繫謫貴州  
婺川知縣有水南集行於世

丁汝謙字子益吉州人正德甲戌進士初官太常寺博  
士擢禮科給事中世廟入繼議尊興獻禮據經史力  
爭為大禮貴人所忌謫曲周縣縣丞遷永平府推官  
終四川安綿道所至皆有廉能聲

王與齡字受甫鄉寧縣人父爵知薊州與齡與兄培齡  
從安陽崔後渠學咸見器重培齡領嘉靖乙酉鄉薦

與齡領戊子鄉薦己丑昆弟咸登進士授蘇州府推官治訟端平擢戶部廣東司主事調吏部驗封司主事遷稽勲員外晉文選郎中用人務進廉靜老成痛絕請謁時有常州訓導缺諸富人爭求之乃用平涼貢士號張貧子者常州知府應子才以廉不阿上更代與齡延見訪問吏治民瘼衆莫敢望子才由是顯與員外浙人鄭曉主事榆次周鈇廣人李義杜將共遏貪殘以張治典正論幾振嚴嵩囑選監生錢可教

知縣翟鑾囑調刑部主事張惟一於吏部胥不從嵩  
屢嗾言官劾奏又遺書御史沅越越於衆前裂其封  
發其圖陷之奸嵩大恨乃因許讚疏白囑託事翟鑾  
嚴嵩辨令削籍為民且率鄭周李咸外謫及歸角巾  
躬稼怡情自得者二十餘年仇者媒孽萬端竟無可  
乘

王煜字青霖鄉寧人萬厯乙酉舉人天性孝友志行端  
方登科二十餘載閉戶窮經與物無競及卒士民惜

之

鄭崇儉字大章寧鄉人萬歷四十四年進士授河南推官有政聲歷濟南兵備副使廉正不擾遠近頌之崇禎三年遷陝西右參政屢遷右僉都御史巡撫寧夏數敗套部賚銀幣世廕錦衣副千戶十二年正月擢兵部右侍郎總督陝西三邊軍務五月總理熊文燦請敕崇儉提兵合擊張獻忠羅汝才崇儉以將帥胥入衛急請曹變蛟還鎮不許徵柴時華及延寧二鎮

兵又不至發西安士馬單弱副將李國奇至洛陽卒  
大譟坐貶一秩獻忠謀入陝崇儉督國奇及賀人龍  
扼之興安賊乃轉入興山大平處楚蜀交先是尚書傅  
宗龍議令崇儉兼督蜀軍而督師楊嗣昌亦檄秦軍  
入蜀崇儉乃以十三年二月率人龍國奇兵直抵瑪  
瑙山與左良玉會初七日兩軍夾擊賊大敗崇儉軍  
獲首功千三百降賊將三十五人獲馬羸甲仗無算  
論功所賜半嗣昌但增一秩復先所降一秩而已獻

忠竄柯家坪蜀將張令追之被圍崇儉急遣兵擊走賊  
復督人龍國奇及高傑等追敗之寒溪寺鹽井先後  
斬首千五百級其黨順天王一條龍一隻龍皆降崇  
儉軍五日三捷威名甚振以年衰乞骸骨不許令還  
關中留人龍國奇討賊及人龍軍大譟歸嗣昌因言  
崇儉撤兵太早致賊猖獗命削籍候代明年春襄陽  
陷上益恨崇儉不犄角平賊逮下獄責以縱兵擅還  
失誤軍律以五月遇害後福王時或建言崇儉未失

一城喪一旅因他人巧卸遂服上刑羣臣微知其寃  
無敢為訟言者臣甚痛之崇儉寃始白

隰州

上古

伍胥黃帝臣見元女兵法路史伍佗也今慈之佗城

周

胡衍蒲人秦伐蒲蒲守恐請衍為蒲說樗里子曰攻蒲  
為魏則善為秦則不可為賴矣請釋勿攻以德魏君



樗里子善之遂解去

漢

王敏字叔公并州隰城人永平中為大司農十六年六月丙寅大司農西河王敏為司徒

唐

曹氏三侯失其名隰州人隋季羣雄蠱起侯之父勇力絕人嘗為萬戶軍命三子各率所部兵經畧隰之郡邑為民保障後父子歸唐相繼撫綏歿後鄉人思之

請於朝入廟崇祀

五代

劉訓永和人仕唐至彰武軍節度丹陽等州觀察制置使後封開國侯贈大尉

宋

周惠字德輔為江淮都轉運使先為真定等處參謀遺德餘烈見於故翰林學士徐復齋及王湫澗碑記子諧

元

賀仁傑永和人貢子少入宿衛世祖召之出白金曰此  
汝父六盤所獻者聞汝母來可持歸養母辭不許乃  
歸白母盡散之宗族會上都留守闕上顧仁傑曰無  
以易卿盧世榮僧格秉政不肯為之下桑哥欲陰中  
之累數十奏上不聽大德九年請老歸卒仁傑妻劉  
氏早歿上欲為娶貴族固辭乃娶民間女已而喪明  
夫妻相敬如賓

賀勝字正卿小字伯顏永和人仁傑子能日馳千里年十六入宿衛凝重寡言大臣有密奏獨留勝許聽之出則參乘輿入則侍幃幄非休沐不得至家時四方以遽聞者上亟欲賜報凡使事輒見遣受命無留行復命無後期遠至六詔交廣西域之屬無不至計所歷無慮數十萬里上親征納延勝直武帳常傳密旨飭諸將還侍側飛矢交帳前獨立不動及還都勝參乘伶人蒙采毳作獅子舞迎駕輿象驚奔逸不可制

勝投身當象前令後至者斷剗縱象乘輿乃安上親撫其創造尚醫尚食視護已拜集賢學士僧格敗上問誰可相者勝曰天下公論皆屬旺扎勒遂相旺扎勒而以勝參知政事大德九年代父仁傑為上都留守兼開平府尹既至通商賈謹出納權貴子弟暴橫者悉繩以法至大三年進中書左丞相行留守如故歲饑輒發廩賑民仍自劾待罪上報曰祖宗以上都之民付卿父子欲安之也卿能如此朕復何憂民德之為

立祠西門外上復命工寫其像以賜俾傳示子孫尋  
以足疾請老不許曰卿臥理足矣賜小車出入禁闥  
初開平人張弼家富奴索錢民家毆負錢者至死治  
獄者教奴引弼子丞相特們德爾受其賄六萬緡屬  
勝出奴勝不從丞相坐都堂召留守將罪之勝昌言  
大奴所干非法不敢從他實無罪御史中丞楊多爾  
濟平章蕭拜珠使御史徐元素按弼子賄得實入奏  
詔逮問及特們德爾復相即繫楊多爾濟蕭拜珠戮

於市且誣勝乘賜車迎詔大不敬并殺之泰定初詔雪其寃追封秦國公謚惠愍子太平

王克敬字叔能大寧人幼奇穎大寧在晉西鄙習尚少文克敬獨孜孜為儒者事初仕江浙左右司都事監倭互市悉屏兵衛撫以恩信番帖然無敢譁鄱陽總管王都中出廩粟賑饑行省欲罪之克敬曰饒距此千里比待命民且死彼為仁而吾屬顧不仁邪遂得免延祐中拜監察御史監吏部選有履歷當升而過

輕者卒升之治書侍御史張伯高曰監選以減駁為能今王御史務崇寬厚可為世道賀矣會議中書堂首言江南包銀民貧不能輸者有司責之役戶當罷兩浙煎鹽戶役重當免其它役從之泰定初出為紹興路總管抽分海舶拗番者例籍其貨克敬曰某貨出某國地有遠近貨有輕重冒重險出萬死舍近而趨遠棄重而取輕豈人情邪遂罷籍轉兩浙鹽運使令私鹽毋得連逮婦人著為令俄調海道漕運都萬



戶天厯之變直沽漕舟多復漕而南行省欲坐罪克敬謂蹈萬死完所漕而還非得已乃請令附次年漕舟達京擢參議中書省事乞覆奏賜錢數曰大長公主供饋素優今賜出無名是不當也諸軍征討賞格未下雲南獨先蒙賞是不均也英后遠還徒御衆多非大賚恩意不能洽今賜物鮮少是不周也文宗是其議除南臺治書侍御史以正綱紀為己任不阿宗戚聲譽益著元統初出為江浙參政松江大姓歲漕

米萬石入京後子孫貧有司仍雜置民賦克敬曰匹夫妄獻米微名爵今身死家破豈可使一郡均其害奏免之尋請老謂人曰穴趾而峻墉必危再實之木必傷其根無功德而忝富貴何以異此又曰世俗喜言勿認真此非名言臨事不認真豈盡忠之道故歷官政績胥可紀時稱名卿雅喜誦讀有得輒手抄為書著詩文奏議傳於世卒封梁郡公謚文肅

賀太平本名惟一字允中永和人勝子勝寃雪襲虎賁

親軍都指揮使元統初累遷御史中丞御史劾中書  
參議佛嘉律時宰庇之惟一辭疾去至正二年詔起  
中書參知政事辭進右丞又辭會佛家閭黜乃起就  
職請均給宗室諸王歲賜選臺閣名臣充守令覈其  
治行時粟貴而金銀賤請委官收市所得不貲後兵  
興卒獲其用六年拜御史大夫故事臺端非國姓不  
授特賜蒙古氏更名太平七年遷中書平章政事國  
王多爾濟居政府復薦為左丞相請勒僧道有妻子

者為民給校官俸賜經筵官坐選清望官專典陳言  
立行都水監治黃河舉隱士董立張樞李孝光等太  
平雅好訪人材南北士必錄於冊至是多進用之初  
托克托出居西寧州力請令歸葬父曰托克托大義滅親  
今父歿而不克奔訃為善者懼矣托克托還因讒間成  
隙斥中書參政孔思立等胥太平所拔用者也九年  
罷太平為翰林學士承旨御史誣劾其過并論其子  
額森呼圖克太平曰吾無罪但當聽命於天遂歸杜門

謝客以書史自適家居六年起為淮南行省左丞相兼知行院事總制諸軍駐濟寧命有司給牛具種麥自濟寧達海州兵賴以濟尋調遼陽行省糴粟以給都城處置有法十七年復召拜中書左丞相而右丞相虛位元時漢人任首輔者獨太平而已畧柳林或勸遷都太平持不可徵同知樞密院劉哈喇布哈於章德引兵擊敗賊又訪求死節士雖布衣亦加贈謚有官者就官其子孫人尤感動右丞相綽斯戡家人

造偽鈔力解之曰安有堂堂宰相而為此者會奇后  
希子早臨政遣宦者保布哈諭意太平不答已又召  
至宮舉酒申前意復依違以出而后黨御史遷他官  
疑額森呼圖克泄其事去太平意益決御史賈珠僧格  
實哩乃先劾左丞成遵參政趙中以二人太平黨也  
太平知勢不可留數辭位二十年拜太保俾養疾於  
家會陽翟王阿勒呼木特穆爾亂起為上都留守太平  
毅然往額森呼圖克故將托歡引兵縛陽翟王太平生

致闕下終不為已功尋拜太傅賜歸時伯勒齊爾命為  
右丞相辭曰若必命臣非得太平同事不可密旨令  
毋行太平至沙井少留御史大夫布哈劾之詔拘宣  
命及賜物綽斯戡更誣奏之安置吐番尋遣使至東  
勝逼令自殺

額森呼圖克名均字公秉太平子少好學累遷翰林侍讀  
學士太平為相務廣延才彥而均以丞相子又傾已  
下士以故名稱藉甚已而被劾罷從父還及父再相

授知樞密院事至正十九年命往討開平盜太平以  
其年少數請改命不允至則遣將復懿州省治盜東  
奔尋罷為上都留守綽斯戡誣婁達實額森呼圖克及  
托歡等不軌執托歡鍛鍊額森呼圖克當貶薩斯嘉之  
地留居多斯滿被杖卒

劉佐隰州人至元中宣授承直郎充太原路織染局提  
舉明年改知本州事器宇寬洪輕財樂施

明



丁珣大寧人監生正德間任石泉時值流賊猖獗人心  
危懼珣身任其勞築城鑿池措置軍餉嚴為捍禦民  
獲保安

張璠蒲縣人正德間任四川招討司經歷以德化蠻人  
聲聞於朝擢知掖縣清苦自甘取予不苟歸時行李蕭  
然掖民泣送之抵家壽幾百歲

馬中牙大寧人萬厯間授臨清判竭力漕務禁河役革  
水飛部院四薦其能晉四川營山知縣營俗侈婚嫁

生女多溺之中豸裁使適中俗為一變有摹假印者  
發其奸人皆悚服奉上檄協采三殿木多獲異材山  
行幾年嘗修文昌閣崇文教立養生社救疾疫人  
尤稱之陞雲南祿勸知州奢寇之變直指疏改蓬州  
中豸力辭歸進階奉直大夫家居博覽群書壽七十  
四卒人推為德望兼隆

張斗星字奎垣大寧人天啟丁卯舉人授潛山知縣經  
寇殘破斗星悉心撫字方獲安堵諸生四人以仇誣

禡其中斗星為辯復寇餘難婦若干人俱遣還家會  
踏災傷值一危蹬人多不敢渡名曰試心橋斗星平  
步徑過少無怖容為口占一絕有曰自檢胸中無別  
物試心橋上獨徘徊

安民字熙寰大寧人生有至性養母凡朝夕膳以意揣  
輒先得其心母病便溺悉手自浣濯居鄉醇謹有古  
君子稱崇禎初以貢授襄城知縣號廉平吏六年寇  
至與城守事城破被執不屈死民規言矩行素恭謹

一旦臨事變從容就義人尤難之

史光代字射墟隰州人幼英敏以績學著崇禎間膺選貢授上蔡縣主簿遷日照縣知縣再遷鄖陽府通判攝府篆正身率屬三年告歸遇寇變以鄉先生任守禦責城破死之兄光前萬厯中捐粟千石賑饑與光代同日盡節

國朝

賀梗蒲縣人生而端重前丁卯舉人知阜平縣行取刑

部主事以明允著

國初繇員外郎郎中考選貴州道監察御史巡視西城  
章疏侃侃人稱為鐵面御史出按山東風采凜然貪  
墨吏胥斂迹甫兩月疾卒幾無以為斂同官出俸錢  
贖之乃克返櫬里人今謂之清門

李呈祥字麟埜號五鹿隰州人前庚午舉人銓注壽陽  
教諭遷延津知縣調陳留入為兵部郎蠹役為民害  
者次第擒治調度城守井井有紀遷順廣兵備道

國初薦起睢陳道遷分守大梁道築河堤數百里開陳橋舊河直南路至今便之遷分巡武昌道招撫劇盜民獲安堵再遷天津道却規例不受內陞通政司通政使尋擢督捕侍郎研剔逃人弊無濫無枉遷兵部侍郎充

殿試讀卷官改戶部侍郎總督倉場嚴禁苞苴運弁旗丁胥頌之尋以改葬補工部侍郎督

皇陵大工力為搏節功垂竣以病請未至家卒呈祥自冷

官至大僚胥有廉聲在工部應

詔陳言指畿輔利病尤中肯綮其卒也優恤視常例加厚  
李允隰州人字寶山官湖廣參將康熙七年賊聚湖南  
七連坪統兵擣之戰三晝夜力盡矢竭遂自刎事聞  
卹葬如例

張自興大寧人起行間歷大同總兵都督僉事自興少  
材武從軍所至陷陣有俯身搴旗之概馭軍寬嚴互  
劑軍士愛而畏之自興事母孝輸族從逋賦三百金

捐大寧馬八匹後卒於官

賜祭葬有加

山西通志卷一百三十五



欽定四庫全書

山西通志卷一百三十六

人物

三十  
六  
文苑一

太原府

晉

郭琦字公偉太原晉陽人少方直有雅量博學善五行  
作天文志五行傳注穀梁京氏易百卷鄉人王游等  
皆就琦學武帝欲以琦為佐著作郎問琦族人尚書

郭彰彰素疾琦答云不識上曰若如卿言烏丸家兒能事卿即堪為郎矣遂決意用之趙王倫又欲用琦琦曰我已為武帝吏不容復為今世吏終身處於家王湛字處沖太原晉陽人晁次子少有識度少言語人莫能知其隱德兄弟宗族皆以為癡晁獨異焉父喪居墓次服闋闔門守靜不交當世兄子濟嘗食湛命取菜蔬對而食之濟見湛牀頭有周易問曰叔父何用此為湛曰體中不佳時脫復省耳濟請言之湛因

剖析玄理微妙有奇趣皆濟所未聞也濟才氣抗邁  
既聞其言心形俱肅嘆曰家有名士三十年而不知  
濟之罪也既而送濟至門濟有從馬絕難乘湛騎此  
馬姿容既妙迴策如縈善騎者無以過之又濟愛所  
乘馬湛曰此馬雖快然力薄不堪苦行近見督郵馬  
當勝但芻秣不至耳濟試養之當與已馬等湛又曰  
此馬任重方知之平路無以別也於是當蟻封內試  
之濟馬果躓而督郵馬如常濟益嘆異還白其父曰

濟始得一叔乃濟以上人也武帝每見濟輒調之曰  
卿家癡叔死未濟常無以答及是上又問濟曰臣叔  
殊不癡因稱其美上曰誰比濟曰山濤以下魏舒以  
上時人謂濤上方山濤不足下比魏舒有餘濤聞曰  
欲處我於季孟之間乎濤歷秦王文學太子洗馬尚  
書郎太子中庶子出為汝南內史卒年四十七子承  
嗣

王承字安期太原晉陽人濤子清虛寡欲無所修尚言

理辨物但明其指要而不飾文辭有識者服其約而  
能通弱冠知名太尉王衍以比南陽樂毅永寧初為  
驃騎參軍避難南下遷司空從事中郎豫迎駕賜爵  
藍田縣侯遷尚書郎不就東海王越引為記室參軍  
敕其子毗曰夫學之所益者淺體之所安者深閑習  
禮度不如式瞻儀形諷味遺言不若親承音旨王參  
軍人倫之表汝其師之在府數年以母老求出越不  
許久之遷東海太守政尚清淨不為細察小吏盜池

中魚綱紀推之承曰文王之圃與衆共之池魚何足惜耶吏拘犯夜者承問之答曰從師受書不覺日暮承曰鞭撻甯越以立威名非政化之本使吏送歸其從容寬恕若此尋去官東渡江每遇艱險處之夷然雖家人不見其憂喜之色至下邳登山北望嘆曰人言愁我始欲愁矣至建鄴為鎮東府從事中郎甚見優禮承少有重譽而接物弘恕衆咸親愛渡江名臣王導衛玠周顗庾亮之徒皆出其下為中興第一年

四十六卒朝野痛惜之自昶至承世有高名論者以祖不及孫孫不及父子述嗣

王修字敬仁小字荀子濛之子也明秀有美稱善隸書號曰流奕清舉年十二作賢人論濛示劉惔惔曰此論便足參微言起家著作郎琅邪王文學轉中軍司馬未拜年二十四臨終嘆曰無愧古人年與之齊矣郭澄之字仲靜太原陽曲人少有才思機敏兼人調補尚書郎出為南康相宋高祖引為相國參軍從北伐

克長安更欲西伐集寮屬議多不同次問澄之澄之不答西向誦王粲詩曰南登霸陵岸回首望長安高祖意遂定曰當與卿共登霸陵岸耳因還澄之位至相國從事中郎封南豐侯卒於官所著文集行於世北魏

閔湛太原人為著作令史崔浩薦有著作之才拜中書博士後與浩同被難

王遵業瓊長子風儀清秀涉歷經史位著作佐郎與司



徙左長史崔鴻同撰起居注遷右軍將軍兼散騎常  
侍慰勞蠕蠕乃詣代京采拾遺文以補起居所闕與  
崔光安豐王延明等參定服章及光為孝明講孝經  
遵業預講延業錄義並應詔作釋奠侍宴詩時人語  
曰英英濟濟王家兄弟轉司徒左長史黃門郎監典  
儀注與中書令陳郡袁翻尚書琅邪王誦並領黃門  
郎號曰三哲時政歸門下世謂侍中黃門為小宰相  
而遵業從容恬素若處丘園嘗著穿角履好事者多

毀新履以學之以胡太后臨朝謀避地自求徐州太后曰王誦罷幽州始作黃門卿何乃欲徐州也更待一二年當有好處分遵業兄弟並交遊時俊為當時所美及爾朱榮入洛以莊帝有從姨兄弟之親相率奉迎俱見害河陰贈并州刺史著三晉記十卷

溫子昇字鵬舉太原人晉大將軍嶠之後也世居江左祖恭之宋彭城王義康戶曹歸魏家濟陰父暉兗州左將軍長史行濟陰郡事子昇初受學於崔靈恩劉

蘭以夜繼晝長乃博覽百家文章清婉為廣陽王深  
賤客在馬坊教諸奴子書作侯山祠堂碑文常景見  
而善之故詣深謝曰頃見溫生深怪問之景曰溫生  
是大才士深由是稍知之熙平初中尉東平王匡博  
召辭人以充御史同時射策者八百餘人子昇與盧  
仲宣孫奉等二十四人為高第預選者皆受屈而去  
奉謂人曰朝來靡旗亂轍皆子昇逐北遂補御史時  
年二十二臺中彈文皆委焉服闋還為朝請李神雋

行荊州事引兼錄事參軍被徵赴省神雋表留不遣  
吏部郎中李獎退表曰昔伯瑜之不應留王朗所以  
發歎宜速遣赴無踵彥雲前失於是還員廣陽王深  
為東北道行臺召為郎中黃門郎徐紇受四方表啓  
答之敏速於深獨沈思曰彼有溫郎中才藻可畏高  
車走珍寶盈滿子昇取絹四十疋深軍敗為葛榮所  
得榮都督和洛興與子昇舊識以數十騎潛送達冀  
州還京李楷執其手曰卿得免足使夷甫慙德自是

無復宦情閉門讀書厲精不已孝莊即位為南主客  
郎中修起居注曾一日不直錄尚書事元天穆奏代  
之莊帝曰當世才子不過數人豈容為此便相放黜  
乃寢其奏及天穆討邢杲召子昇同行曰吾欲收其  
才用豈懷前忿也子昇不得已見之加伏波將軍為  
行臺郎中元顥入洛天穆召子昇問之對曰元顥新  
入人情未安今往討之必有征無戰王若克復京師  
奉迎大駕桓文之舉也捨此北渡竊為大王惜之天

穆善之而不能用遣子昇還洛為中書舍人莊帝還  
復為舍人天穆每謂子昇曰恨不用卿前計除正員  
郎仍舍人帝殺爾朱榮子昇預謀赦詔乃子昇詞也  
榮入內遇子昇把詔書問是何文字子昇顏色不變  
曰敕榮不視之永熙中為侍讀兼舍人鎮南將軍金  
紫光祿大夫遷散騎常侍中軍大將軍領本州大中  
正梁使張舉寫其文筆傳於江外梁武曰曹植陸機  
復生北土恨我辭人數窮百六陽夏守傅縡使吐谷

渾見其國主牀頭有書數卷乃子昇文也濟陰王暉  
業嘗云江左文人宋有顏延之謝靈運梁有沈約任  
昉我子昇足以陵顏轢謝含任吐沈楊遵彥作文德  
論以為古今辭人皆負才遺行澆薄險忌唯邢子才  
王元景溫子昇彬彬有德素齊文襄引為大將軍諮  
議作神武碑文成以元僅劉思逸荀濟潛謀疑預知  
之餓諸晉陽獄而卒太尉長史宋游道收葬之集其  
文筆為三十五卷子昇言有準的不妄毀譽撰永安

記三卷無子弟子盛州主簿有文才年二十餘卒

北齊

王修太原人風儀蘊藉天保中尚書北海王忻以雅談  
獲罪諸弟尚守而不墜自茲以後此道頓微修與范  
陽盧昌衡順丘李若彭劉泰珉河南陸彥師隴西辛  
德源並為後進風流之士

隋

王劭字君懋太原晉陽人松年子少沈默好讀書齊尚



書僕射魏收辟參開府軍事累遷太子舍人待詔文  
林館時祖孝徵魏收陽休之等嘗論古事有所遺亡  
討閱不能得劭具論所出取書驗之一無舛誤繇是  
人稱博物後遷中書舍人隋初授著作佐郎母憂在  
家著齊書為內史侍郎李元操所奏上遣收其書覽  
而悅之起為員外散騎侍郎修起居注劭以上古有  
鑽燧改火之義近代廢絕上表請變火從之又言上  
有戴干之表指示羣臣賜物數百段拜著作郎屢言

符命寵錫日隆時黃鳳泉得二白石頗有文理遂附其文以為字於是採人間歌謠引圖書纖緯依約符命摭撫佛經撰皇隋靈感誌合三十卷奏之上令宣示天下大業中遷秘書少監卒於官劭在著作將二十年專典國史撰隋書八十卷多錄口敕又採不經語初撰齊志為編年體二十卷復為齊書紀傳一百卷及平賊記三卷又指摘經史謬誤為讀書記三十卷時人服其精博

王元規晉陽人少孤隨母依舅居臨海郡時年十二有  
富室劉瑱欲妻以女母因子弱欲結強援元規泣請  
曰因不失親古人所重豈得苟安異壤輒婚非類母  
感其言而止從師受業十八即通諸書舉高第除安  
成王記室參軍東宮引為學士授禮記左傳除尚書  
祠部郎每國家議大禮常參預焉在江州四方從學  
甚衆入隋仕至秦王府東閣祭酒著春秋發題辭及  
義記十一卷春秋左傳音三卷禮記音二卷孝弟義

記二卷載經籍志

王頴字景文祁人僧辯子年數歲入闕少好游俠年二十勤學累載遂徧通五經究其旨趣解綴文善談話年三十周武帝引為露門學士每有議決多頴所為好讀諸子又曉兵法益有縱橫之志隋開皇五年授著作佐郎尋令於國子講授上親釋奠論難孝經詞義蜂起國子祭酒元善見屈上大奇之超授國子博士後配防嶺南數載授漢王諒府諮議參軍王甚禮

之諒舉兵數進奇策諒不能用楊素至蒿澤將戰頽  
謂其子曰氣候殊不佳兵必敗汝可隨從我既而自  
殺頽撰五經大義三十卷集二十卷

唐

王珣字伯玉方翼子與兄璵弟璿以文學稱時號三王  
天授初珣及進士第應制科遷藍田尉以拔萃擢長  
安尉因進見武后召問刑政嘉之詢其族氏對曰廢  
后臣姑也左遷亳州司法參軍神龍初為河南丞武

三思矯制貶臨川令宋璟薦授侍御史出為許州長  
史歲旱開廩賑民即自劾元宗赦之累遷工部侍郎  
而璿至中書舍人珣嘗為秘書少監數年璿繼職終  
右散騎常侍卒贈戶部尚書諡曰孝子錡天寶中右  
補闕殿中侍御史

武甄字平一文水人潁州郡王載德子博學通春秋工  
文辭武后時隱嵩山中宗復位平一居母喪迫召為  
起居舍人景龍二年兼修文館直學士自請抑母黨

上言去歲熒惑入羽林太白再經天太陽虧月犯大  
角臣聞災不安生上見下應信如景響詩曰唯此文  
王小心翼翼昭事上帝聿懷多福陛下天性孝愛戚  
屬外家恩洽澤濡臣一宗階三等家數侯朱輪華轂  
過許史梁鄧遠甚恩崇者議積位厚者釁速故月滿  
必虧日中則移時不再來榮難久藉昔永淳之後王  
室多難先聖從權故臣家以宗子竊祿疏封今上聖  
復辟宜退守園廬乃再假光寵爵封如初高班厚位

遂超涯極故陰氣僭陽河洛汎溢昔王族驕盈梅福  
上書竇氏專縱丁鴻進諫且后妃之家恩過寵深一  
朝覆沒遂無噍類願思抑損之宜長遠之策推遠之  
權以全親親慰勉不許遷考功員外郎時太平安樂  
公主各立黨相詆毀平一上書請悉召近親貴人會  
宴內殿告以輯睦申以恩勤斥姦人塞讒路上美其  
忠切卒不用初崔日用自言明左氏它日學士大集  
日用折平一曰君文章固耐久若言經則敗績矣平



一乃請所疑日用曰魯三桓鄭七穆奈何答曰慶父  
叔牙季友桓三子也孟孫至彘凡九世叔孫舒季孫  
肥凡八世鄭穆公十一子子然及二子子孔三族亡  
子羽不為卿故稱七穆子罕子駟子良子國子游子  
卬子豐也一坐驚服平一問日用曰公言齊桓公楚  
莊王時諸侯屬齊若楚凡幾平公靈王時諸侯屬晉  
楚凡幾晉六卿齊楚執政幾何人日用謝曰吾不知  
君能知乎平一條舉始末無留語日用曰吾請北面

闔坐大笑後設宴兩儀殿歌言淺穢言大饗群臣不  
容以倡優嫖狎虧汙朝典平一上書不納元宗初貶  
蘇州參軍徙金壇令既謫而名不衰開元末卒孫元  
衡儒衡

王翰字子羽并州晉陽人少豪健恃才及進士第張嘉  
貞為長史偉其人厚遇之張說至禮益加復舉直言  
極諫調昌樂尉又舉超拔羣類說輔政召為秘書正  
字擢通事舍人駕部員外郎說罷出為汝州長史徙

仙州別駕日與才士豪俠飲樂游畋伐鼓窮歡貶道  
州司馬卒

路敬淳并州人少好學盡孝居喪依廬三年尤明姓系  
以譜學名家

王維字摩詰九歲知屬辭與弟縉齊名資孝友開元初  
擢進士調大樂丞坐累為濟州司倉參軍張九齡擢  
右拾遺歷監察御史母喪毀幾不生累遷左補闕庫  
部吏部郎中天寶末為給事中及西狩維為賊得以

藥下利陽瘖祿山迎置洛陽迫為給事中時大宴凝  
碧池悉召梨園諸工合樂賦詩悼痛云萬戶傷心生  
野煙百官何日更朝天秋槐葉落空宮裏凝碧池頭  
奏管絃賊平下獄或以詩聞行在縉請削官贖維罪  
肅宗亦自憐之下遷太子中允久之遷中庶子中書  
舍人復拜給事中轉尚書右丞縉為蜀州刺史未還  
維自表已有五短縉五長臣在省戶縉遠方願歸所  
任官放田里使縉得還京師久乃召縉為左散騎常

侍上元初卒年六十一贈秘書監維工草隸善畫名  
盛於開元天寶間寧薛諸王待若師友寶應中代宗  
語縉曰朕嘗於諸王座聞維樂章今傳幾何遣中人  
王承華往取縉哀集詩六卷文四卷上之

王之渙并州人兄之咸之賁皆有文名天寶間與王昌  
齡崔國輔鄭昉聯迭和名動一時

唐次字文編太原人憲裔孫建中初及進士第歷侍御  
史竇參數薦之改禮部員外郎出為開州刺史韋皋

鎮蜀表副使諭罷之次為辨謗畧三篇改夔州刺史  
憲宗召還授禮部郎中知制誥終中書舍人憲宗嘗  
覽辨謗畧善之謂學士沈傳師曰凡君人者宜所觀  
省然次編錄未盡卿可廣其書傳師等增為十篇更  
號元和辨謗畧

劉縱陽曲人陳許軍節度使昌裔子為光祿主簿學於  
樊宗師士大夫多稱之

王塤太原人韓愈送塤序曰太原王塤示予所為文好

舉孟子之所道者與之言信悅孟子而屢贊其文辭  
王彥威太原人少孤貧力學舉明經甲科淹識古今典  
禮求為太常散吏卿知其經生補檢討官彥威采獲  
隋訖唐沿革禮條次彙分號元和新禮上之拜博士  
憲廟藏山陵事議用十二月下宿建言高祖中宗六  
月太宗四月高宗九月睿代二宗皆五月德宗十月  
順宗七月惟元肅二宗皆十二月有為為之非常典  
也且卜歲暮則畢祔在明年正月是改元慶賜皆廢

矣詔更用五月李夷簡言憲宗功高宜稱祖穆宗下其議彥威奏宜稱宗制可時祔主畢又還告太極殿彥威以為不可執政怒坐祝辭誤奪俸削階終不回屈後累擢司封郎中弘文館學士諫議大夫為勘定淄青十二州兩稅使差量纖悉人不為煩還兼史館修撰興平民上官興殺人亡命吏囚其父興自首請罪議減死上言殺人者死百王共守原而不殺是教殺人有詔貸死彥威詣宰相據法爭下遷河南少尹



俄改司農卿雅善李宗閔進拜平盧節度使開成初  
召為戶部侍郎判度支嘗見文宗顯奏曰臣按見財  
量入以為出隨色占費終歲用之無毫釐差假令臣  
一旦迷愚欲自欺沒亦不可得因上占雒圖又為供  
軍圖上之嘗奏復神策軍以廩餼於度支取直俄檢  
校禮部尚書為忠武節度使毀山房三千餘所盜無所  
容徙節宣武封北海縣子性彊敏善著書多行於時卒  
贈尚書右僕射諡曰靖

溫岐字飛卿改名廷筠彥博裔孫少敏悟工為辭章與  
李商隱皆有名號溫李與貴胄裴誠令狐湍等狎數  
舉進士不中第授方山尉徐商鎮襄陽署巡官不得  
志去歸江東令狐綯方鎮淮南廷筠怨居中時不為  
助力過府不肯謁徐商執政頗右之欲白用會商罷  
楊收疾之遂廢卒

白行簡字知退太原人居易弟擢進士辟廬坦劔南東  
川府入朝授左拾遺累遷主客員外郎判度支案進

郎中長慶時振武營田使賀拔志歲終結課最詔閱  
實發其妄行簡敏而有辭後學慕尚寶歷二年卒

唐彥謙字茂業并州人咸通時舉進士十餘年不第乾  
符末攜家避地漢南中和中王重榮鎮河中辟從事  
光啓末貶漢中掾曹楊守亮鎮興元署判官累官至  
副使閬壁絳三州刺史彥謙博學多藝文詞壯麗書  
畫音樂胥出輩流號鹿門先生集三卷

溫憲廷筠子登進士第光啓中為山南從事能世其詩

學

王景太原人為司門員外郎萊州刺史能詩

王武陵字晦伯太原人官尚書郎能詩嘗序宿慧山寺  
詩曰視富貴如浮雲一歌一詠以抒情性

狄煥字子炎梁公仁傑之後隱於南岳有詩名

王緒太原人僧辯裔孫謨永寧公輔梁書黜陳不列蕭  
穎士佐之著蕭梁史譜及梁不禪陳論以發緒義例  
使光明

後五代

王景純太原人少客燕感家世儒者不當用材武進乃南遊嵩洛得譚用之為友以文章相砥礪寢以文稱天會中還家至境上會北漢睿宗據太原嘆曰天下將定以區區一方拒天下兵此危國也遂止上黨潞州帥延致幕府後不復作吏時時購四方書鈔之晚年集書數千卷北漢亡入宋端拱中終于汴

宋

陶穀字秀實太原人祖唐彥謙有詩名父渙領夷州刺史唐季為邠帥楊崇本所害因隨母柳氏育邠州之新平十餘歲能屬文起家校書郎單州軍事判官避晉祖諱改姓陶嘗以書干宰相李崧崧甚重其文時和凝亦為相同奏為著作佐郎集賢校理改監察御史分司西京遷虞部員外郎知制誥時廢翰林學士兼掌內外制詞目繁委穀言多委愜為當時最天福八年賜緋袍靴笏黑銀帶九年加倉部郎中穀性急

率嘗為究帥安審信所奏責授太常少卿上言頃泣  
西臺每見臺司詳斷刑獄少有即時決者至於閭閻  
夫婦小有爭訟淹滯踰時坊市死亡喪葬必俟臺司  
判狀奴婢病亡亦須檢驗吏因緣為姦而邀求不已  
經旬不獲埋瘞望申條約以革其弊從之俄拜中書  
舍人請教習樂工停二舞郎及禁民伐桑棗為薪並  
從其請開運三年賜金紫遼人北歸脅穀令從行穀  
逃匿僧舍素工厯數遂歸漢為給事中乾祐中轉對

言五日上章乞停轉對羣臣有所聞見即許不時詣  
闕門奏從之仕周為右散騎常侍世宗遷戶部侍郎  
從征太原為翰林學士時命承旨以下撰為君難為  
臣不易論平邊策策率言修文德來遠人惟穀與竇  
儀楊昭儉王朴以封疆密邇江淮當用師取之世宗  
自克高平常訓兵講武及覽忻然聽納由是平南之  
意益堅顯德三年遷兵部侍郎加承旨時刻木為耕  
夫織婦蠶女置於禁中穀進贊辭顯德六年加吏部



侍郎宋初轉禮部尚書依前翰林承旨乾德二年判  
吏部銓兼知貢舉再為南郊禮儀使法物制度多穀  
所定時鹵簿清游隊莫知甲騎具裝制以問穀穀上  
其制又大輦制久亡穀創意造之後承用焉明德門  
成詔為記後累加刑部戶部二尚書開寶三年卒年  
六十八贈右僕射穀強記嗜學博通經史諸子佛老  
咸所總覽多蓄法書名畫善隸書為人雋辨宏博而  
多忌好名云子邴起居舍人天禧四年錄穀孫實試

秘書省校書郎

王貽孫字象賢溥子少隨周祖署商潁二州衙內都指揮使顯德中改朝散大夫著作佐郎宋初遷金部員外郎賜紫累遷右司郎中淳化中卒溥聚書萬餘卷貽孫遍覽之多藏法書名畫太祖嘗問趙普拜禮何以男子跪而婦人否普問禮官不能對貽孫曰古詩云長跪問故夫是婦人亦跪也唐武后朝夫人始拜而不跪普問所出對云太和中幽州從事張建章

著渤海國記備言其事普大稱賞之端拱中右僕射  
李昉求都省百官集議舊儀貽孫具以對時論許其  
諳練云

楊寘字審賢晉人察弟也少有雋才慶厯二年舉進士  
京師試國子監禮部皆第一既試崇政殿上臨軒啓  
封見名喜動于色謂輔臣曰楊寘也遂擢第一公鄉  
稱賀為得人授將作監丞通判潁州未至官持母喪  
病羸卒特詔賻恤其家先是其友夢寘作龍首山人

寘自謂龍首我四冠多士山人無祿位之稱我其終  
是乎已而果然

狄遵度字元規裴子少穎悟篤志於學每讀書意有所  
得即仰屋瞪視人呼之弗聞也以父任為襄邑縣主  
簿居數月棄去好為古文著春秋雜說多所發明嘗  
作擬皇太子冊文除侍御史制裴晉公傳人多稱之  
尤嗜杜甫詩嘗讚其集一夕夢見甫為誦世所未見  
詩及覺纔記十餘字遵度足成之為佳城篇後數月

卒有集十二卷

任山平晉人有大志法春秋作通記擬井田作中田圖  
嘗應詔言事富弼厚遇之所著有晉溪集

邢鑑字叔明文水人少而篤學有經世濟物之心從晉  
谿任先生遊講習十年行修經明時方以詞賦取士  
鑑潛心經術因見詘於是謀道山林不復以仕進為  
意嘗與參政歐陽修范仲淹學士石介為知交卒年  
六十有七

王誥字晉卿緘子工詩畫日從蘇軾游詩牋酬答無間  
尚主官至留後

金

王璿字君玉太原人天眷二年進士弟珙字器玉珣字  
汝玉皇統九年同榜家世業醫有陰德聞里中嘗有  
金蠶金馬之瑞璿仕至汾陽軍節度使鄉人榮之號  
三桂王氏仲澤其從孫也金馬在部掾清卿房迄今  
寶之

劉滋字文榮合河人六歲賦詩曰鶯花新物態日月老  
天公

劉昂字之昂興州人大定十九年進士曾高而下以科  
名相踵者七世昂天資警悟律賦自成一家輕便巧  
麗為場屋捷法作詩得晚唐體尤工絕句往往膾炙  
人口李屏山故人外傳曰之昂早得仕年三十三省  
掾考滿授平涼路轉運副使人謂鄉相可坐致矣術  
士言之昂官止五品之昂不信也俄母憂為當塗者

所忌連蹇十年卜居洛陽有薦其才者泰和初自國  
子司業擢左司郎中會緣執政賈鉉事降上京留守  
判官道卒竟如術者言

郝侯字子玉太原人正隆二年進士歷鳳翔府治中充  
遼史刊修官仕至河東北路轉運使自號虛舟居士  
有集行世張汝霖嘗奏曰郝侯能屬文宦業亦佳章  
宗謂宰臣曰郝侯賦詩佳舊時劉迎能之李晏不及  
也子居簡字仲寬有詩名太原平陽間居中字仲純



樞密院令史出身嘗刺坊州人物楚楚正大末除鳳翔治中南山安撫使詩亦有名

倪民望字具瞻李屏山所謂倪侯頭如筆其鋒不可當者也又張韶九成寄朔州荀輔臣云陳雷膠漆輕餘子楚漢風雲屬少年李忠直卿賦雲云不將柳絮春風比好作梨花月夜看至於蘇吉莘老李鵬翼冲霄與具瞻之子仲儀詩文多可傳

李汾字長源太原平晉人為人尚氣跌宕不羈性褊躁

觸之輒怒是以不為人所容喜讀史工詩雄健有法  
避亂入闕京兆尹子容愛其才招致門下留二年去  
之涇州謁左丞張行信一見禮以上客元光間游大  
梁應舉不第用薦為史館書寫殊不自聊時趙秉文  
為學士雷淵李獻能皆在院刊修際汾在旁正襟危  
坐讀太史公左丘明一篇或數百言音吐洪暢旁若  
無人既畢顧四坐漫為一語云看秉筆諸人積不平  
而雷李尤切齒乃以嫚罵官長罷去明年上書言事

不合客唐鄧間恒山公武仙署行尚書省講議官既而仙與參政完顏思烈相異同頗謀自安懼汾言論欲除之汾覺遁泌陽仙令總帥王德追獲之絕食而卒年未四十平生詩甚多不自收集傳者十二三而已

王渥字仲澤後名仲澤太原人性明俊不羈博學善談論工尺牘字畫清美有晉人風少游太學長於詞賦登興定二年進士第為時帥鄂屯邦獻完顏色埒所

知故多在兵間後辟寧陵令有治蹟入為尚書省令  
史使宋至揚州應對敏給宋人重之還為太學助教  
轉樞密院經歷官俄遷右司都事稍見信用及內族  
色埒行省事於鄧州以渥為左右司員外郎從行色  
埒入援自汝州過密縣遇元兵武仙欲阻澗色埒不  
聽渥勸曰武仙大小數百戰經涉不為不多兵事當  
共議色埒疑其與仙有謀幾斬之渥自以為無愧於  
內不懼也已而色埒果敗渥歿於陣中州集仲澤博

通經史有文采善談論工書法詩其專門之學人物  
楚楚若素宦於朝吏事則與冀京父相上下其辨博  
又屏山所許天下談士三人之一也

元

同恕字寬甫太原人五世祖僑奉元祖昇父繼先博學  
能文廉希憲辟掌庫鑰家世業儒同居二百口無間  
言恕羈卹如成人日記數千言年十三以書經魁鄉  
校至元間貢禮曹辭不行仁宗初拜國子司業儒林

郎三召不起陝西行臺侍御史趙世延請即奉元置  
魯齋書院中書奏恕領教事制可之來學者千數延  
祐時再主鄉試人服其公六年以奉議大夫太子左  
贊善召入見東宮賜酒慰問因獻書歷陳古誼英宗  
初以疾歸致和元年拜集賢侍讀學士以老疾辭恕  
之學由程朱上遡孔孟教人曲為開導性整潔平居  
雖大暑不去冠帶事異母如所生父喪哀毀致目疾  
家無擔石儲而聚書數萬卷區所居曰渠菴時蕭鄭

居南山下入城府必主恕家士論稱曰蕭同恕家居  
十三年鄉里稱先生而不姓至順二年卒年七十八  
贈翰林直學士封京兆郡侯諡文貞著集菴集二十  
卷

張欽榆次人登進士第歷太原路儒學教授博洽善屬  
文有韓柳風士類多宗慕之

郝忠恕交城人佑之子翰林待制獻所著無逸圖帝悅  
命總裁宋遼金三史成歸隱終身學宮卦山有篆書

碑文詳見一統志

王守誠字君實太原陽曲人氣宇和粹性好學從鄧文原虞集游文辭日進泰定元年試禮部第一賜同進士出身授秘書郎遷太常博士續編太常集禮若干卷轉藝林庫使與著經世大典拜陝西行臺監察御史除奎章閣鑒書博士拜監察御史僉山東廉訪司事改戶部員外郎中書右司郎中拜禮部尚書與修遼金宋三史書成擢參議中書省事調燕南廉訪使



至正五年除河南行省參知政事奏差憲使籍廉訪使家銅梁縣尹張文德捕殺賊百餘人重慶府官以私怨使縣吏誣之擬杖一百為直其事辨析贓訟多所平反釐正職田因疏言仕於蜀者地僻路遙俸給薄何以自養請以戶絕及屯田荒者召人耕種收其入以增祿秩宜賓縣尹楊濟亨欲於蟠龍山建憲宗神御殿儒學提舉謝晉賢請復文翁石室為書院皆采以上聞成之風采聳動居諸道最進資政大夫河

南行省左丞未上母喪邁疾至正九年卒年五十四  
賜鈔萬緡諡文昭有文集若干卷

郭恭元貞間登進士第善用帛為大書飛動有神今大成殿東羅漢堂匾皆其遺筆

聶天章交城人至元間舉進士第善文辭有修行授朝列大夫後左遷趙城令因辭歸不出

周居仁太原人器量宏遠博通經史學明行修而力農自給教授生徒卒門人私諡曰靜安先生

胡巨源榆次人登進士第任高麗軍民總管儒學教授  
博學多著述蔚有文稱子惟堯領鄉貢仕晉寧路學  
正寬裕不事邊幅士子樂與之游博雅出巨源右

杜質榆次人性嚴重博學有雅量一吟一咏胥包括道  
義激勸風化人士雅重之歷翰林院編修江北燕南  
兩道廉訪司經歷江南諸道監察御史

明

楊一奇交城人嘉靖癸未進士河南嵩縣知縣執法除

暴吏畏民懷陞陝西鄜州知州未赴著有太極圖說  
畧義學史談易經四書讀書錄補讀書紀見自笑錄  
體物韻語行於世

閻樸字文甫榆次縣人教諭大綸子嘉靖壬辰進士選  
翰林院庶吉士元輔李文康極器重之授檢討充經  
筵講官晉左春坊左贊善告歸值敵犯邑城與有司  
協力固守起補原官兼署左右春坊司經局印陝西  
守臣請復河套下九卿會議樸亢聲曰謀事貴有成

算今海內困敝兵食兩虛深入窮荒倘有蹉跌為害  
匪細議上得允遷南京國子監祭酒進六館諸生嚴  
試之如鎖闥例且曰儒者立志當以聖賢為準聖賢  
一誠其本五倫其實六德六行六藝其目也閱五旬  
忽有旨以赴任違限勒令閒住歸築小園結茅屋數  
椽列琴尊圖史其中著有通鑑逸旨榆次志山西通  
志稿諸書

王道行字明甫陽曲人嘉靖庚戌進士初授鄧州知州

遷大名同知轉蘇州知府正直廉介所至吏畏民懷  
尋陞應天副使陝西參政再陞河南按察使四川布  
政使以耿介忤當路歸杜門著書有桂子園集行於  
世

朱表杪字竹溪陽曲榮靖王曾孫醇謹好讀書日取秦  
漢典籍朝夕誦誦間為詩賦皆精工出人意表雅喜  
臨池明窓淨几臨摹古人墨蹟尤善草書以右軍大  
令為宗能得其筆意予知鼇束髮習聲律年甫壯學

成嘗選奇玉柱峰藐射姑山所至雄詞麗句與烟嵐  
相映發士大夫迄今稱之

徐行岢嵐人性強記為文千言立就志行敦篤善教人  
治戴禮者胥出其門隱居草野讀書自娛年八十餘  
手不釋卷子瑤除永平教授珮無錫丞忠厚咸有父  
風

李重熙岢嵐人家貧不能給饘粥棲西山寺不爐不扇  
足跡不入城市有句云聖賢渡口休行錯義利關頭

要認真蓋自況也

國朝

李中馥號鳳石太原縣人天啓甲子舉人性剛鯁進退不苟為孝廉五十年未嘗一入公府明季直指使者薦辭不赴卯辰間饑典衣賑貸嘗捐修縣城甲申闖寇遣人授偽官怒曰乃公向不趨召今寧為賊屈耶閉門臥不顧比姜逆亂登陴畫守禦方畧縣令邵煥元恃以無恐雅嗜讀書晚年益勤朝夕不釋卷揄揚



後學不去口著從好集石鼓考本草目錄銀杏園文

集藏於家

侯璋字樸庵陽曲人康熙丙午午丁未聯捷進士官內閣  
中書璋少穎異喜經濟學熟肄禮樂兵農錢穀鹽鐵  
諸務及改試策論指陳利害殊悉在鳳池揮毫染翰  
望益著戊午典湖廣鄉試手諸生卷殫神簡閱夜漏  
數十下不少倦放榜日卒可謂克勤其官

閻若璩字百詩太原縣人少奇慧博極群書而句字必

精核不少苟尤嗜吟詩類張籍王建擬古樂府曉暢  
中義蘊宏深山左趙秋谷嘗謂山陽閻百詩學問博  
洽前無古人而若璩於王司寇唐賢三昧之選抉摘  
其舛謬如東南御亭上之訛却涪陽何處尋之訛潯  
胥為訂正不少假康熙戊午舉博學宏辭久之卒予  
詠進士官中書舍人若璩僑居淮安故秋谷稱山陽  
閻百詩云

張志遠字鵬期陽曲人品行端潔為諸生博學工制藝

善詩詞旁通醫學而楷書尤精得黃庭遺法督學高  
龍光稱其整密勁雅可配文待詔徵明為晉人楷法  
冠晚年學益勤聚羣書手自評隲著詩詞稿三卷詩  
叶正韻一卷切音要訣一卷醫學抄要八卷

平陽府

周

屋廬子晉賢人著書言彭聃之法

漢

杜摯字德魯河東人文章叙錄曰初上笏賦署司徒軍謀吏後舉孝廉除郎中令轉補校書摯與母丘儉鄉里相親故為書與儉求仙人藥一丸欲以感切儉求助也其詩曰聞有韓衆藥信來給一丸儉答曰韓衆藥雖良或更不能治摯竟不得遷卒於秘書著文賦傳於世

晉

賈弼之平陽襄陵人廣集百氏譜記專心習業晉太元

中給令史書撰定繕寫藏秘閣及左右曹弼之仕至  
員外郎子匪之驃騎參軍家傳譜學

前宋

賈淵字希鏡平陽襄陵人弼之孫宋孝武時青州人發  
古冢銘云青州世子東海女郎上問學士鮑照徐爰  
蘇寶生並不能悉希鏡對曰此司馬越女嫁荀晞兒  
檢訪果然由是見遇敕注郭子昇明中齊高帝取為  
驃騎參軍武陵王國郎中令歷大司馬司徒府參軍

竟陵王子良使撰見客譜出為句容令希鏡三世傳譜學凡十八州士族譜合百帙七百餘卷核究精悉皆如貫珠當時莫比永明中衛軍王儉抄次百家譜與希鏡參懷撰定建元初遷長水校尉傖人王泰寶買襲琅邪譜坐被收子棲長謝罪稽顙流血獲免後為北中郎參軍卒撰氏族要狀及人名書並行於時

梁

賈冠河東襄陵人五代祖弼晉太元中為散騎常侍撰

姓氏簿狀十八州百十六郡合七百一十二篇甄析  
士庶無所遺宋王弘劉湛好其書弘每日對千客可  
不犯一人諱湛為選曹亦撰百家譜以助銓序焉弼  
傳子匪之匪之傳子希鏡撰姓氏要狀十五篇尤所  
諳究希鏡傳子執更作姓氏英賢一百篇又著百家  
譜廣湛及王儉王僧孺所記執傳孫冠撰梁國皇太  
子序親簿四篇

唐

尹知章絳州翼城人少雖學未甚通解忽夢人持巨鑿破其心忽驚寤志思開徹遂編明六經諸生嘗講授者更北面受大義長安中擢定王府文學遷太常博士中宗時或建言以涼武昭王為七廟始祖知章議武昭遠世非王業所因乃止出為陸渾令棄官去時散騎常侍解琬亦罷歸與知章覃思經術舉訢訢然張說表諸朝擢禮部員外郎轉國子博士馬懷素緒定秘書奏是正文字每休沐講授未始輟於易老莊



書尤懸解弟子貧者賙給之性和厚人不見有喜愠  
未嘗問產業其子欲廣市樵米知章曰如而計則貧  
人何以取資且吾尚應奪民利邪卒官注傳多行於  
時門人孫季良等頌其德刻著東都國子監門外  
敬會真平陽人開元初詔舉治易老莊者中書令張說  
以會真聞賜衣幣侍讀兼侍講學士終太學博士

宋

邢昺字叔明神山人僑濟陰太平興國初舉五經擢九

經及第授大理評事知泰州鹽城監賜錢三十萬曷  
請鹽改隸楚州從之明年召為國子監丞遷尚書博  
士出知儀州就轉國子博士代還賜緋選為諸王府  
侍講雍熙中遷水部員外郎改司勳端拱初賜金紫  
累遷金部郎中真宗改司勳俄知審刑院以曷儒者  
命劉元吉同領冬遷右諫議大夫咸平初改國子祭  
酒二年為翰林侍講學士校定周禮儀禮公羊穀梁  
春秋傳孝經論語爾雅義疏加階勳俄為淮南兩浙

巡撫使於便坐令講左氏春秋侍讀預焉五年講畢  
宴崇政殿賜襲衣金帶加器幣仍遷工部侍郎兼國  
子祭酒學士如故知審官院權知院事景德二年上  
言亡兄素嘗舉進士願霑贈典特贈大理評事是夏  
幸國子監閱庫書問經版幾何曷曰國初不及四千  
今十餘萬經傳正義皆具臣少從師業儒時經具有  
疏者百無一二蓋力不能傳寫今版本大備士庶家  
皆有之斯乃儒者逢辰之幸也先是印書餘紙鬻以

供監中雜用曷請歸之三司上又令舉經術該博德行端良者以廣學員三年加刑部侍郎一日上從容語及宮邸舊僚淪喪殆盡唯曷獨存翌日賜白金千兩且詔其妻至宮庭賜冠帔四年曷以羸老自陳願給假一年歸視田里上命坐慰勞之因謂曰便可權本州何須假耶超拜工部尚書知曹州職如故辭曰賜襲衣金帶特開龍圖閣召近臣宴崇和殿上作五七言詩二首賜之預宴者皆賦曷視壁間尚書禮記

圖指中庸篇曰凡為天下國家有九經因陳其大義  
上嘉納之及行又令近臣祖送設會於宜春苑大中  
祥符初東封召還命判留司御史臺禮部尚書曷素  
習田事多采農家說為對三年請告特詔太醫診視  
六月上親臨問賜名藥一奩白金器千兩繒綵千匹  
召其子太常博士知東明縣仲寶國子博士知信陽  
軍若思還侍疾踰月卒年七十九贈左僕射三子並  
進秩初雍熙中曷撰禮選二十卷獻之太宗探其帙

得文王世子篇甚悅問衛紹欽曷為諸王講說曾及此乎紹欽曰諸王常時問曷經義曷每至發明君臣父子之道必重複陳之太宗益喜真宗嘗因內閣暴書覽而稱善召曷同觀作禮選贊賜之曷言家無遺稿願得副本上許之繕錄未畢而曷卒亟詔寫二本一本賜其家一本俾置家中曷講孝經禮記論語書易詩左氏傳據傳疏數引外多引時事為喻深被嘉獎上嘗問管仲召忽及鄭注禮記世子篇各隨其事

理以對仲寶後為三司判官至祠部郎中坐事貶卒  
若思終駕部郎中

孫復字明復晉州平陽人居泰山學春秋著尊王發微  
十二篇大約本陸淳而增新意山東自石介下皆以  
先生事之年四十不娶李迪知其賢以其弟之子妻  
之復初猶豫石介與諸弟子請曰公卿不下士久矣  
今丞相不以先生貧賤欲託以子宜因以成丞相之  
賢名復乃聽孔道輔聞其賢就見之介執杖履立侍

復左右升降拜則扶之其往謝亦然介既為學官語人曰孫先生非隱者也於是范仲淹富弼皆言復有經術宜在朝廷除秘書省校書郎國子監直講車駕幸太學賜緋衣銀魚召為邇英閣祇候說書楊安國不悅罷之又坐孔直溫貶處州監稅徙泗州知長水縣簽書應天府判官事通判陵州未行翰林學士趙槩等十餘人言復經為人師不宜使佐州縣留為直講稍遷殿中丞卒賜錢十萬復治經勝胡瑗既病韓



琦言於上選書吏給紙筆命其門人祖無擇就復家  
得書十五萬言錄藏秘閣特官其一子

張會元翼城人仁宗朝鄉舉累舉進士不第退而講授  
一時人才蔚起募工修文廟先聖賢像文潞公記稱  
之載學宮志

甯智曲沃人嘉祐鄉進士哲宗問樞密副使王巖叟從  
誰學對曰從河東甯先生由是知名

郭純洪洞人治平中進士官至宣德郎長于史學溫公

稱其有遷固才子旦亦舉進士宣和間簡州文學終  
亳州司法參軍因家亳

金

喬辰字君章初名逢辰洪洞人天德三年進士自號蓮  
峰真逸詩樂府胥有名子字德容八歲能鼓琴召  
入東宮顯宗稱其不凡大定十六年登科貞祐初為  
益都按察轉運使與田琢胥沒兵間

鄭時昌字仲康洪洞人孝友性成八歲通易讀書過目

成誦寒暑不輟大定間對策第一世宗欲以典樞要  
辭不受就汾州教授抵西河訪予夏衍河汾之傳理  
學大明編韻類忠節事并羣書會要行於世

毛麾字牧達平陽人大定十六年舉學行特賜進士出  
身授校書郎入教宮掖歷太常博士終於同知沁州  
軍州事有平水集行世

王琢字器之平陽人與毛牧達友善性孝友為鄉里所  
稱酷嗜讀書往往手自抄寫家素貧而能以剛介自

持未嘗有所丐貸時命不偶年四十五病卒士論惜之有姑汾漫士集行世所著聖人賦尤工詩好押強韻務以馳騁為功云

郭用中字仲正平陽人大定七年進士歷浮山簿陝州錄事卒年三十一有寂照居士集郝子玉毛牧達鄭仲康為之引

王綱字振之洪洞人金章宗時廷試詞賦賜狀元及第官翰林院修撰撰忠孝歌行於世

趙文昌字公權平陽人明昌二年進士仕至遼東路鹽  
使博學好持論周常山甚愛之子觀字維道從事史  
院資謹厚趙秉文許其字畫進進不已可到古人云  
張著字仲揚永安人泰和五年以詩名召見應制稱旨  
特恩授監御府書畫

許天麟曲沃人自幼寡言笑博學能文尹河津同知堅  
州事政尚寬大以奉訓大夫晉寧路判官致仕子益  
國學生善楷書工詩除國正雖食頃亦置書几案間

元

屈繼平以程朱之學為當時學者倡門人號曰北城先生事具墓碑中太常博士侯均撰也碑云先生姓屈諱繼平字正卿晉翼城人祖以上名失於兵考真字子正晦德弗輝妣閔氏先生遭天弗弔七歲而孤性敏強記鄉儒柴奉先太奇之曰子可壻矣遂以女許之供其朝夕俾就學焉習舉子業於鄉先生崔良佐詩文大出時輩至元十三年以鄉試中式遂得儒官

版籍生平手不釋卷好獎誘後進亟為鄉閭所推重  
既得程朱義理之學即濯去科舉餘習每以所得誘  
進學者喻以為人之道故翼之儒者知有程朱之學  
自先生始大德元年二月十七日以壽卒是月十八  
日葬於邑古澗西先塋之兆祀鄉賢

張著字仲明號蒙溪至元初中詞賦選既而嘆曰士當  
以遠大期雕蟲篆刻何為者遂沈潛伊洛之學中統  
改元頤齋張公宣撫河東擢主潞城簿政廉明未幾

以親去西歸薦授平潞教授以成就後進為己任晉人以文名者多出其門壬辰卒所著有蒙溪集詩學淵源子思敬能紹父業歷任無為茶陵二州後提舉河南江北儒學號寓堂有文集行世

徐毅字伯弘趙城人幼從許衡文正公學由進士為監察御史力陳臺省治要尋遷右司郎及刑部尚書能彌綸庶政復拜各道廉使遂參議中書拜御史中丞特贈中書左丞護軍卒追封平陽郡公諡文靖



張遵信字誠之陵下人幼習舉業大德間鄉薦與兄友  
愛甚至晚從臨川先生吳澄學聖賢之學得體認之  
實至大間任本縣學諭擢晉府經歷常匾堂曰時思  
臨川為之記

房祺臨汾人為河中大同兩路教授終潞州判官著有  
橫汾集子希文泰定甲子解元著有淵雲集

劉尚質曲沃人泰定進士任稷山令遷翰林編修拜內  
臺御史忠直敢言克舉其職尚質與學士靳榮同時

胥負文名懸車後相與倘佯太平館中飲酒賦詩當時艷稱之

傅起巖汾西人初為丞相掾歷西臺治書陞中書左丞知經筵事後拜西臺中丞多著勲績卒諡正獻

靳柱字天石襄陵人善屬文有韓柳體登至正丙午科進士及第初授正平縣尹尋拜監察御史父克傑封集賢院都事

王士元平陽人舉進士歷官風憲遷國子司業以崇文

少監致仕持身廉正文行政事皆可師法所著有拙菴集  
單鵲臨汾人仕至四川行省郎中著有河汾集

楊統洪洞人號洪崖讀書自樂不求聞達與張雲谷友  
善以詩文見稱於時

房灝臨汾人號白雲子有詩名於時

柴潛道襄陵人志高尚博極羣書工詞翰不樂仕進教  
授鄉間有古隱逸風號秋巖莊靖處士集古詩一帙  
名秋巖小稿行於世

張容號桂巖洪洞人與守大友善相攜同隱詩學齊名  
時號二高士

張守大號雲谷洪洞人元季不樂仕進隱於箕山躬耕  
自給博覽羣書以吟咏自適善書法詩文胥擅名於  
時人稱高士

王邇臨汾人隱居安邑博通經史精於易春秋累辟不  
就述東周四王年譜行於世卒年七十四葬條陰之  
阜

張翥字仲舉晉寧人父為杭州鈔庫使因家焉少負才  
豪放不羈一旦翻然謝客閉門讀書晝夜不輟從李  
存家安仁學古文辭又從仇遠學詩遂以詩文鳴於  
時後至元末同郡傅起巖居中書薦翥隱逸授國子  
助教分教上都修宋遼金三史為國史院編修官史  
成歷應奉修撰累遷太常博士翰林侍講學士兼祭  
酒勤於誘掖論辨輒雜以談笑各厭其所得嘗詣中  
書議時政衆論蠭起翥獨默丞相綽斯戡問之對曰

諸人議皆是但事勢有緩急施行有先後耳以翰林學士承旨致仕博囉特穆爾入都強翦草詔削奪庫庫特穆爾官爵且發兵致討翦不從曰吾臂可斷筆不能操也博囉誅詔為河南平章仍翰林承旨致仕給全俸終身卒年八十二翦長於詩近體長短句尤工今傳蛻庵樂府三卷又嘗著忠義錄

明

胡純平陽人翰林應奉洪武以耆儒碩學徵至京師授

以官不就謫廣西桂林府閉戶却掃潛心性理之學  
都督韓觀嘗造其宅終不報謝再至謂曰先生於觀  
似無情者純曰將軍知我我固如此所謂士伸於知  
已者觀歎息而去

張昌字思廣臨汾人元時登進士第以世亂不就顯職  
為晉山書院長洪武初聘至禮部考究禮儀得大體  
太祖深嘉之除國子監助教授皇太子經尋致仕歸  
昌學博才高甲子丁卯庚午三主本省布政司鄉試

創府志顯微闡幽所著有存齋稿

李德霍州人講學於其鄉及見學正曹端退語諸生曰  
學不厭教不倦曹子之盛德也至其知古今達事變  
末學鮮及之古云得經師易得人師難諸生得人師  
矣遂避席去端高其行誼命諸生延致之講明正學  
宋拯洪洞人永樂甲申進士任戶部主事梧州府同知  
起府左長史陞江西提學僉事振作士類一時人文  
蔚興平生所作詩文數千篇有稿行於世



周麟臨汾人永樂乙酉解元幼嗜學博通經子入監送  
秘閣纂修永樂大典授清豐教諭造士有方陞肅府  
教授輔成王德與方伯后執中講論理學有河汾益  
友之稱一時縉紳出其門者甚衆有詩文遺稿

杜駿翼城人幼習舉業聞薛文清講學河津負笈從之  
授太極圖說遂大悟隱居不仕弘治間提學王鴻儒  
延問體用一源顯微無間之旨稱為隱君子

梁綸字文音曲沃人正德癸酉舉人授隆慶知州勤勞

廉介別蠹愛民歷七載如一日乞歸百姓如失慈父  
母擁輿牽留橋為之圯立生祠祀之家居足不近公  
庭與邑賢士大夫為真率會以齒德重賓筵嘉靖壬  
辰饑盡出俸餘賑之多識奇字諳聲韻著稽古叶聲  
三卷享年八十一

李鑄字仲南曲沃人莊簡浩子京兆鏞弟自少坐臥一  
樓數年不履戶外常曰不讀萬卷書作文皆兒女子  
氣莊簡以平逆藩功將蔭之力辭讓其弟卜居景明

山莊鑿白石洞優游其中以詩文自適後為策名太學終不赴詳呂涇野太史白石樓記世稱白石先生著有白石山人集

劉鈿翼城人剛毅正直不為習俗所移時翼易無傳鈿則博聞強識早夜鑽研講授不怠故翼之易學皆源流也以貢授洧川縣訓導洧川士素不媚子史且不諳經書與義鈿親為講解多所發明六年致仕祀洧川名宦子志字寧鄉嘉靖丙戌進士授戶部主事性

耿介不謁權貴陞陝西僉事轉參議疏請歸養承懽之道極其周至

呂陽臨汾人嘉靖庚戌進士性豪宕不羈不以仕進為意官中書科中書解組歸窮年學古博極羣書著有經世心鑑晉詩選雅等集行於世

李廷寶曲沃人嘉靖乙酉舉人性高潔清貧自守不一履長吏庭知清苑縣路衝民疲拊循盡力會世廟辛承天往返供億多方調劑上下賴之後歷淮鳳二府

通判景耀二州知州終榮府左長史所至咸有聲績  
喜讀書履仕籍三十年手未嘗釋卷經經緯史雅有  
次第所藏數千餘卷著有曲沃志先民事蹟錄毅軒  
詩文牧民懿矩兵機要略諸書子日照隆慶丁卯舉  
人掖縣知縣平賦賑饑太宰趙吉亭極嘆獎之遷大  
名府同知攝開州元城長垣滑縣諸篆亦能聚書成  
父志

李弘道襄陵人萬厯丁丑進士授南陽知縣補羅山民

祠祀之擢兵科給事中直言忤時出為潁州僉事時  
年尚壯掛冠六載起關西巡道復推陞關南參議乞  
休歸後陝西御史林時疏薦賚白金二十兩優異之  
起潁州兵備因治水與總河見左改關南道歷九月  
復告歸所著有遵道議衛道議易補傳春秋傳周禮  
解等書

呂乾健字天常曲沃人登萬曆丁丑進士授商丘知縣  
勞來撫循興利除害招流民三百餘戶開荒田數百

頃陞戶部主事監兌館陶詳出納杜浸漁綜理周密  
軍民騰歡立石頌德後轉餉雲中事竣歸省卒所著  
有理學源流奉使漫稿等書

左立功字性餘洪洞人萬厯甲午舉人父世嘉諸生秉  
性樸實著庭訓錄以教子立功實奉其訓初授三原  
教諭課士育才歷泮縣知縣陞永平同知所至以清  
廉聞政事之暇晤對詩書著瓊霏玉屑為居官居家  
規箴弟立德亦諸生奉父兄之教端謹自飭著累坑

齋新詞俱刊三晉語錄中

閔重光字紹南曲沃人萬厯中貢本邑及鄰縣人士從遊者甚衆戊申按察司李本寧禮聘修山西通志辛亥趙澹寧請纂本縣志皆稱史才業師徐歿而家貧重光酷暑赴洛禮葬之授鄆陵訓導訓士有方多所造就兩院交章舉薦卒於官

邢大道字性之洪洞人御史實子生而穎異有奇姿稍長取父所積先秦兩漢書悉讀之弱冠補博士弟子



文名鵲起顧數奇遂罷經生業築舍澗許之南日與  
友吟眺佳山水所著詩文李臬憲本寧深為歎賞萬  
厯己酉與范明經耀昆同應聘修山西通志博採淹  
貫既成歸杜戶不出所著白雲巢集二十四卷行於  
世

李珊字西野洪洞人少喜讀書隆冬盛暑不輟韓忠定  
器重之督學高其行給冠帶不受結廬杜門二十餘  
年鄰人亦罕識其面

馬紹武字振初曲沃人父善六甲奇門書將授之武曰  
不試無益試之必至邊關豈忍馬首東西貽父母憂  
乎遂潛心儒學兼業岐黃事親色養居繼祖妣喪盡  
禮哀藥囊北遊平水作精詣堂會體驗程朱書暨讀  
書錄年二十有八卒著孝友論崇正辨復性解諸說  
載自修錄中

張沐字裕心平陽衛人初名芝問師王濬初曰晉張芝  
何如人師曰善學書沐曰學不務本於身心何益乃

更名沐父早卒事母孝喜讀先儒語錄壁間大書一誠字手訂治心編卒年二十五

陳師亮號精一子襄陵人八歲父卒母裴氏年二十六守節師亮天性孝友潛心正學佩服程朱語錄從辛復元遊著日新錄適性稿等書安貧樂道母病篤割股和藥以進病隨愈有司匾旌節孝督學張象南拔入邑庠卒年三十四遺二子妻李氏事姑撫幼守志終身人稱一門雙節云

趙需字萬東太平人性穎能文尤長於詩甘貧樂道不求聞達名公咸推重之

王標字爾瞻太平人性淡寡營闢墅一區繙書種藥坐臥其中者三十年著牖下十書等集

范弘嗣字耀昆號竹溪洪洞人明崇禎間以貢生授德州州判遷湖廣都司經歷致仕歸未幾復保舉典所司列名上請詔令赴部抗疏辭不赴弘嗣淹貫經籍學有根柢經指授者如張鵬起申嘉言為時名臣及

判德州却漕儲例費漕卒咸額手白蔣令誤謫之寃  
入京適都門戒嚴上防禦四策明年致政歸初萬厯  
中李維禎纂修山西通志聘弘嗣主其事至是與辛  
全桑拱揚輩講心性之學閉戶著述有毛詩補亡諸  
書行於世

### 國朝

衛蒿字匪莪曲沃縣人初名麟徵字瑞鳴尋以哭母喪  
易今名字嘗主衛文清塾及賈中丞自秦撫歸築義

學訓鄉人子弟延蒿為師蒿雅善說書聽者豁然心  
解問業士屢滿戶外今晉人所傳四書答問是也久  
之不樂棄去已復往來絳山平水教授生徒以為常  
蒿學無不窺而持論頗嚴進退以禮有古君子風

王永命字九如臨汾縣人少受學於桑暉升中順治戊  
子鄉試知遷安縣擢行人司行人以病請告歸永命  
事父母孝居喪寢苫枕塊者三年直指劉題

旌孝子其泣遷安也修城池新廟學理鋪舍尋奉檄整理

邊牆躬親畚鍤民不知勞後遷安民建祠祀之里居  
不一入公府鄉里有急難輒傾囊佐之不少吝著蓼  
莪操有懷堂筆松韻堂筆邊工漫記行於世

李方秦字仙葉曲沃縣人孝廉丕猷子順治丁酉舉人  
教諭陽曲遷太原府教授再遷宣平縣知縣卒於官  
方秦幼讀書淹貫古今為學博以社稷之祭與山川  
風雲雷雨同壇非王制詳請改正先是奉

詔纂修山西通志方秦與焉前後九年勞最著至是復輯

縣志條分縷析紀載為獨詳比遷宣平或以地僻遠  
勸弗往方秦曰擇官而仕如臣誼何卒後數十年弟  
貢生方芄乃藏厥葬事

王之旦字元夫曲沃縣人中順治庚子鄉試辛丑會試  
中式甲辰成進士授贛榆知縣卒於官之旦雙目如  
巖下電少意氣縱軼壯而肆良知家言無所得尋讀  
讀書錄才數行輒躍然起曰道在是矣嘗謂學文清  
者當以誠入以敬成著日新編魏敏果公象樞亟稱



之里人蘇加誠鰥居養母為人傭不受直曰但飲食  
老母足矣之旦為授室贛人王文昌嫠婦董牧牛養  
舅之旦表其閭閻兆婦曹以烈著之旦弔其廬甲乙  
間蝗旱禱輒應以勞勩成疾老嫗數十輩長號衢中  
祈令君長壽贛人王膚功纂野史紀要書其事

賈佩徵字賓臣曲沃縣人幼學於柴明經茂徵嘗薈萃  
四子書論仁章精思者三十年癸卯舉於鄉己巳授  
太原縣教諭令黃本訥問先生何以教諸弟子佩徵

曰主臣夫仁道首謹巧令某嘗自檢言色恐負官守  
某行歸矣閱五十日輒具詳乞休曰教諭一官雖係  
閒局風厲學校厥任實重今士習囂競義利罔辨一  
旦得志於時治術卑汙流毒生民皆教官衰耄昏憤  
訓迪無道又復耽戀爵祿不能引身而退之罪也某  
老且病曠職是羞祈放還田里俾得心安遂拂衣歸  
臥東園之雪龕年八十二卒學者稱雪龕先生

賈鳴璽字荆生易再生曲沃人教諭佩徵子少警穎康

熙癸卯舉鄉試第一丁未成進士考授內閣撰文  
中書舍人鳴璽性清介初第貴人某導謁要人  
拒不許在中書富人某願奉千金佐輸粟不答士大  
夫高之晚年偃臥山村不一入城市嘗修曲沃縣志  
平陽府志事訖輒返卒著存悔堂詩存悔堂古文藏  
於家

范鄔鼎字彪西洪洞縣人以五經中丙戌鄉試副榜辛  
卯舉人戊戌會試副榜辛丑中式丁未成進士請終

養戊午朱太常裴薦學問淵博以母老辭癸未

聖祖仁皇帝西巡

召詣行宮


賜山林雲鶴四大字鄔鼎性孝友通籍後閉戶讀書立希  
賢書院置學田修虞士晉太師明韓尚書衛太守墓  
著內篇外篇數十種而三晉詩選續垂棘諸集網羅  
放失山右文獻賴之癸未迎

駕進理學備考廣理學備考陳文正廷敬嘗賦詩曰歸來

屬車上猶指少微星蓋紀實也子翔亦以五經中辛卯鄉試副榜癸巳恩科舉人

田雲太平縣人前歲貢生嘗應師儒賢才舉安貧著書以老雲少嗜閱覽涉獵百家一日讀薛文清讀書錄慨然曰道在是矣手一編昕夕玩索不少輟建弘孝書院與同志賈中屈擢升講學肄業者屢滿戶外其學以曹辛二人為津途而泝源於河汾著安邑性宗絳陽正傳以示學者賈著衍易全書幽人心聲屈著

隨見錄與雲胥稱耆儒云



山西通志卷一百三十六